

Dill' wen dill' kob daa bzej Juanna'

Beena' nak Xtill' Chioza' golje' goke' to beŋ'

¹ Ba zoakzə beena' le Xtill' Chios ka wxē wzil yog'lołte dii de. Len' ba zoalene' Chioza', na' lekzen' Chioza',

² na' dezd nechte ba zoalenkze' Chioza'.

³ Len' bene' yog'te dii de, na' biga de to dii bi bene'.

⁴ Len' cho'e yel' mban, na' nake' beeni' che beŋ' yell-lioni.

⁵ Na' beeni' che'na' chzeeni'n yell-lioni gani nak shgasj shchol ni che dii mala', na' yel cholā' bi bizoyin yisolān beeni'na'.

⁶ Wzoa to beŋ' bsel' Chioza' wlie' Juan.

⁷ Juanna' bidyee dill' che beena' nsa' beeni'na' kwenche yog' beŋ' gonlilall'gake'ne'.

⁸ Aga Juanna'yen'nan nsee beeni'na', san to bidtixje'ze' che beena' nsa' beeni'nan'.

⁹ Beena' nsa' beeni'na' daa nak dowalj daa wzeeni'n lao yog'loł beŋ', ba zee yell-lioni.

¹⁰ Na' beena' nsa' beeni'na' bidsoe' yell-lioni, na' la'kzi le' bxe bsile' yell-lioni, beŋ'ka' lle' lawinna' aga gokbe'gakile' non nake'.

¹¹ Blline' ladj beŋ'ka' nak beŋ' yell che', na' legake' bi blebgake'ne'.

¹² Per yog' beŋ'ka' blebgake'ne' na' benlilall'gake'ne', bene' legake' xiin Chios.

13 Na' aga daa nakgake' beṇ' de beli chenān, wa daa cheeni beṇ' soalen l̄jwellen', ni aga daa cheeni beṇ' soa xiīnen', san daa beṇ' l̄lall' gake' nen' gokgake' xiīn' Chios.

14 Na' beena' le Xtil' Chios golje' goke' to beṇ' de beli chen na' wzoe' ladjnto'ni. Na' ble'into'ne' nake' beṇ' zakii n̄leb daa nake' Xiīn tlish' tyaj Xacho Chioza', na' nake' beṇ' lall'do' xen in̄leb na' bli'e do ka nak dii lina'.

15 Na' Juanna' bi'e dill' che' wne':

—Che beenin bzajniid' le' kana' wnia': “Beena' zi' za' nake' beṇ' zak'chi aga ka nad', la' ba zoakze' kana' zi' soa' nad'.”

16 Daa nake' beṇ' wen in̄leb na' daa chakchgaile' cho', dii zan dii wenka' ba bene' che yog'cho.

17 Dii Moiséza' bzajniile' cho' diika' bliia Chioza' bia' goncho; per Jesucristona' bli'e ye' chiyesh'lalli che Chioza' len dii li che'na'.

18 Ni to konon' ile'i Chioza', per Xiīne'na' nak tlish' tyaj, beena' zoalene'ne', len' bidliile' cho' ka nake'.

Juanna', beena' bchoa beṇ' nisa', bi'e xtil' Jesucristona'

(Mt. 3:11-12; Mr. 1:7-8; Lc. 3:15-17)

19 Beṇ' wṇabia' che beṇ' Israelka' lle' Jerusalénna' bsel'gake' to chop b̄xoz na' sto chop beṇ'ka' nak xiīn dia che dii Levina' kwenche jan̄abgakile' Juanna' non nake'.

20 Na' bi bkwashee non nake', san golle' legake':

—Aga nadaan Crístona', beena' chbezcho wsel' Chioza'.

21 Na'ch wizṇabgakile'ne':

—¿Norakzan nako' shka'? ¿Alin' Elíaza', beena' wdixjee daa goll Chioza'ne' kani'yi?

Na' Juanna' chi'e:

—Aga le' nad'.

Na'ch chize'gake'ne':

—¿Alin' beena' ba llia bia' yid kwenche chixji'e daa che' Chioza'ne', shka'?

Na' che' Juanna':

—Akza le' nad'.

²² Na'ch che'gake'ne':

—¿Norakzə li', shka'? Cheeninto' inezinto' kwenche lljayellnto' beñ'ka' bsel' neto' non nako'. ¿Bi ka ino' che kwino'?

²³ Na'ch che' Juanna' legake':

—Dii Isaíaza', beena' wdixjee daa goll Chioza'ne' kani'yi, dill' chan' bi'e kana' wne': “To beñ' gosyee zillj latja' gana' bibi chashj chleb, na' ine': Li se kwas kwenche wzenagle che Xanchona' kat' zee.”

²⁴ Na' beñ'ka' bsel' fariseoka'

²⁵ wñabgakile'ne':

—¿Berache chchoazo' beñ' nis shi aga lin' Crístona', ni Elíaza', ni beena' llia bia' wsel' Chioza' kwenche chixji'e daa chi'ene'?

²⁶ Na' che' Juanna' legake':

—Nad' chchoa' beñ' nis, per ladjleni zoa to beñ' bi nombia'le,

²⁷ na' len' zi' wli'lawe'. Na' nad' ni bi zakaa gak' xmose' kwenche galj' la'ch' xe'le'na'.

²⁸ Yog' diiki gok gana' le Betania, daa llia shlaa yao Jordanna', gana' bchoa Juanna' beñ' nisa'.

Jesúza', beena' bsel' Chioza', zaklebile' xil'do'na' chitgake'

29 Na' betiyo ble'i Juanna' Jesúza' zeje' kwite'na', na' chi'e:

—Li wwia, beenin bsel' Chioza' na' zaklebile' xil'do'na' chitcho, la' len' yikwase' saaxya che ben' yell-lioni.

30 Na' xtill' beenin bi'a kana' wnia': "Zi' za' to ben' zak'chi ka nad', na' ba zoakz beeni kana' zi' soa'."

31 Ni nad' bi wñezid' no xtiliin bi'a, per kwenche gombia' ben' Israelki le', bidchoa' ben' nis.

32 Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' le'.

33 La' ni nad' bi wñezid' no xtiliin bi'a, per Chioza', beena' bsel' nad' chchoa' ben' nis, wne': "Ile'ilo' yetj Espíritu cha'na' lljsoalene' beena' wlej', na' len' gone' ka yidsoa Espíritu Sántona' loo yichjlall'do' ben'."

34 Ba ble'id' gok ka wna Chioza' nad', na' naa nia' le' beenin Xiin Chioza'.

Ben'ka' bengake' Jesúza' txen dii nech

35 Na' betiyo Juanna' zelene' chop ben'ka' nakgake'ne' txen.

36 Na' ka ble'ile' chda Jesúza' na', na'ch chi'e:

—Li wwia, beenin bsel' Chioza' na' zaklebile' xil'do'na' chitcho kwenche chiyakxen saaxya chechoka'.

37 Na' chop ben'ka' nak Juanna' txen, ka bengak-ile' wna Juanna' ka', na' janogake' Jesúza'.

38 Na'ch ka biyechj Jesúza', ble'ile' zjanogake'ne' na' chi'e legake':

—¿Bin cheenile?

Na' che'gake'ne':

—Rabí, ¿garan zo'?

(Na' Rabí zejín: beṅ' chli' chsedi beṅ'.)

³⁹ Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana', la' ka do chida tapan billinlengake'ne' gana' zoe'.

⁴⁰ Na' beena' le Andrés, beṅ' bish' Simón Pédróna', len sto beṅ' yoblə gokgake' chopə janogake' Jesúza' ka bengakile' daa wna Juanna' che'.

⁴¹ Na' Andréza' lii jadiljtie' beṅ' bishee Simónna', na' chi'ene':

—Ba billemento' beena' nak Mesíaza'—, Na' Mesías zejín Cristo, beena' chbezgake' wsel' Chioza' kwenche inabi'e.

⁴² Na'ch Andréza' bchi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiin Jonáza', na' naa yilio' Cefas—. Na' Cefas zejín Pedro.

Jesúza' golle' Felípena' len Natanaela' gakgake'ne' txen

⁴³ Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':

—Da dino nad'.

⁴⁴ Felípena' nake' beṅ' yell Betsaida, gana' nak lall Andréza' na' Pédróna'.

⁴⁵ Na'ch jadilj Felípena' Natanaela' na' chi'ene':

—Ba billemento' beena' bzej dii Moiséza' xtilleena' lee libr che leya'. Na' lekzka' chen' bzej dii beṅ'ka' wdixjee daa goll Chioza' legake' kani'yi. Len' Jesúza', beṅ' Nazareta', xiin Joséna'.

⁴⁶ Na' Natanaela' chi'ene':

—¿Aka Nazareta' ichej to beṅ' zakii?

Na' Felípena' golle'ne':

—Dakachi kwenche gakbe'ilo'.

⁴⁷ Na' ka ble'i Jesúza' zej Natanaela' gana' zie', golle':

—Ni za' to beṇ' nak dowalj beṇ' Israel, to beṇ' bi nak beṇ' wxiye'.

⁴⁸ Na'ch goll Natanaela'ne':

—¿Nakra chak nombi'o nad'?

Na' Jesúza' golle'ne':

—Ka zi' yidnelə Felípena' li', ble'id' li' xan yag yixwewa'.

⁴⁹ Na' goll Natanaela'ne':

—Maestro, lin' nako' Xiin Chioza'. Na' lin' beena' zidnabia' neto' beṇ' Israel.

⁵⁰ Na' goll Jesúza'ne':

—¿Aadaa wnia' ble'id' li' xan yag yixwewan' chajli'o cha'? Zi' ile'chilo' dii xench aga ka dga.

⁵¹ Na' lekzka' gollch Jesúza':

—Dii li nia' le', ile'ile yabana' nyaljan, na' beṇ'ka' nak anjl che Chioza' chep chetjgake' lawa', nad', Beṇ' Bsel' Chioza' Yell-lioni.

2

Got' to wishagna' yella' le Caná

¹ Na' biyoṇ lla got' to wishagna' yella' le Caná daa llia gana' mbani Galileana', na' na' len xṇa' Jesúza'.

² Na' lekzka' goxgake' Jesúza' na' beṇ'ka' nakgake'ne' txen.

³ Na' shlak chak lṇina' bibill vino che'ka', na' goll xṇa' Jesúza'ne':

—Ba bibill vino che beṇ'ki.

⁴ Na'ch che' Jesúza'ne':

—¿Berache nazo' nad' ka'? Biṇ' gal' gon' daa llia bia' gon'.

⁵ Per xṇeena' golle' wen mandadka':

—Li gon kon bin inē' le'.

⁶ Na' na' zoa xop yes' xen de yaj, dii choll nis, di-ika' chon llin kat' ben' Israelka' chixi chiyechgake' kon ka na ley che'ka'. Na' to to yes'ka' chollan ka do shon yid nis.

⁷ Na' che' Jesúza' wen mandadka':

—Li kaa nisa' loo yes'ki.

Na' wda'gake'n axt ka billa'chagakan.

⁸ Na'ch che' Jesúza' legake':

—Li gash' lataan naa na' li lljeen beena' ngoo lo neen.

Na' bengake' ka golle'.

⁹ Na' beena' ngoo lo neen bnixe' nisa' daa biyak vino, ni bi nezile' ga wza'n. Tochga wen mandadka' nezgakile', la' legaken' wdaagake' nisa'. Na'ch beena' ngoo lo neen goxe' bi'na' chshagna',

¹⁰ chi'eb':

—Yog' ben' zigaate chdie' vino wenna', na' kat' ba weej ben'ka' len lnina' dii zil, na'ch chdie' daa bi naktek wen. San li', ba bzagoo vino wenni na' axt naach chdio'n.

¹¹ Yel' waki dga ben Jesúza' yell Canána' daa llia gana' mbani Galileana', lennan' bene' dii nech. Na' ka' bli'e yel' wak che'na' nape', na'ch ben'ka' nongake' le' txen ben' lill'all'gake'ne'.

¹² Na' ka wde, biyaje' Capernaúma' len xneena', len ben' bisheeka' na' len ben'ka' nakgake'ne' txen, na' wzoagake' na' to chop shon lla.

Bishesh Jesúza' ben'ka' chit' chde lesh' chyoodo'na'

(Mt. 21:12-13; Mr. 11:15-18; Lc. 19:45-46)

¹³ Na' ka ba zoa gal' lni Paskwa' daa chon ben' Israelka', wyaj Jesúza' Jerusalénna'.

14 Na' ka blline' lesh' chyoodo'na', ble'ile' lle' ben' chit'gake' goon, xil', na' palom, na' lekzka' na' chi' ben'ka' chisha' mecha'.

15 Na' ka ble'ile' ka chak, bene' to do tashj, na' kon len bisheshile' yog'lole' lesh' chyoodo'na' lente goonka' na' xil'ka'. Na' bzalee xmech ben'ka' chisha' mecha' lo yona' na' bishi'e mes che'ka'.

16 Na' ben'ka' chit' palomka', golle' legake':

—iLi yishesh baki ni! iBi gonzle lill Xa'na' ka lao yaa!

17 Na'ch ben'ka' nakgake'ne' txen jadingakile' Cho'a Xtill' Chioza' gana' nan: “Daa le chakid' lill xlatjo'na' len wlliai'n nad'.”

18 Na'ch ben' Israelka' lle' na' che'gake' Jesúsza':

—iBi yel' wak gono' dii wli'n napo' yel' wnabia' kwenche chono' diiki?

19 Na' che' Jesúsza' legake':

—Li yichinj yoodo'ni na' lo shonə llazə yiyona'n.

20 Na'ch che' ben' Israelka' le':

—Xopiyon yiz bengake' yoodo'ni, na' li' nazo' shonə llazə yiyono'n.

21 Per daa goll Jesúsza' legake' ka', kwerp che'nan' bsaklebile' yoodo'na'.

22 Na'ch ka biban Jesúsza' ladj ben' wetka', jadini ben'ka' nakgake'ne' txen daa wne', na' wyajle'gake' Cho'a Xtill' Chioza' na' dill'ka' be' Jesúsza'.

Nombia' Jesúsza' yichjlall'do' yog'cho

23 Na' shlak zoa Jesúsza' lni Paskwa' Jerusalénna', ben' zan wyajle'gake' che' daa ble'gakile' yel' wakka' bene'.

24 Per Jesúsza' bi bxenilallee legake', la' nombi'e yichjlall'do' yog'lol ben'.

²⁵ Aga byalljile' no yee le' nakan nak benecha', la' kwaslol nombi'e yichjlall'do'eka'.

3

Jesúza' bshaljlene' Nicodémona'

¹ Wzoa to fariseo ben' wle Nicodemo, na' goke' to ben' wñabia' ladj ben' Israelka'.

² Na' Nicodémona' wyaje' jawie' Jesúza' wal-lə na' chi'ene':

—Maestro, nezinto' Chioza' bselee li' kwenche wli' wsedilo' neto', la' bi gak gono' yel' wakka' chono' shel' bi zoalen Chioza' li'.

³ Na'ch Jesúza' chi'ene':

—Dii li nia' li', beena' bi yiyalj dii yoblə aga wak lljazoe' gana' chñabia' Chioza'.

⁴ Na' che' Nicodémona'ne':

—¿Nakra gon to ben' gol yiyaljze' dii yoblə? La' aga wak yiyo'e loo lee xneena' kwenche yiyalje' sto shii.

⁵ Na' Jesúza' chi'ene':

—Dii li nia' li', kono gak yiyaj gana' zoa Chioza' chñabi'e shi bin' galjlenile' nis * na' yikob Espíritu che Chioza' yichjlall'do'ena' kwenche gake' ka ben' galj sto shii.

⁶ Beena' nak xiin ben' de beli chen, de beli chenchokzan nake'. Per beena' chikob Espíritu che Chioza'ne', nake' xiin Chios na' de to yel' mban che' daa bi te cheyin.

* **3:5** Galjlenile' nis: bal ben'ka' nsed nagake' zejin daa chchoacho nisa', na' zi balgake' nagake' zejin nisa' daa chzani xna'chona' cho', na' zi balgake' nagake' zejin daa chixis chiyib Espírituna' cho' kat' chonilall'cho Cristona'.

⁷ Bi yibanilo' daa nia' li': "Yog' beṅ' chiyal' galje' dii yoblə."

⁸ Kat' chze be'na' na' chajan kon ga cheenin, na' la'kzi chenicho ka sshag chonan aga neṅicho galan za'n, ni bi neṅicho galan zejan. Lekzkan' aga neṅicho nakan chon Espíritu che Chioza' kwenche chiyal' beṅ' dii yoblə.

⁹ Na'ch wiznabi Nicodémona'ne':

—¿Nakra gak gakz dga?

¹⁰ Na' che' Jesús'a'ne':

—Len naktio' to beṅ' chli' chsedi beṅ' Israelki, ¿ana' bi neṅilo' diiki?

¹¹ Dii li nia' li', choe'nto' dill' che daa neṅinto' na' daa ben ble'into', per bi chajle'le daa nanto' le'.

¹² Shi bi chajle'le daa wnia' le' che diika' chak yell-lioni, ¿alechlə shi we'len' le' dill' che daa nak che yabana'?

¹³ Ni to konon' shep yabana', toz nad', Beṅ' Bsel' Chioza' Yell-lioni, nak' beṅ' za' yabana'.

¹⁴ Na' ka ben dii Moiséza' gana' bibi chashj chleb bdee bel' de broncena' lee yaga', ka'kzan gongakile' nad', Beṅ' Bsel' Chioza' Yell-lioni. Wda'gake' nad' lee yaga'

¹⁵ kwenche nottez beṅ' gonlilall' nad' bi kwiajee, san gat' to yel' mban che' zejli kaṅi.

Chaki Chioza' yog' beṅ' yell-lio

¹⁶ 'Daa le chakchgayi Chioza' beṅ' yell-lioni, bselee Xiine'na' tlish' tyaj kwenche nottez beṅ' gonlilalleene' bi kwiajee, san gat' yel' mban che' zejli kaṅi.

¹⁷ Chioza' bselee xiine'na' yell-lioni aga kwenche wlliajee beṅaan, san kwenche yisle' legaken'.

18 'Beena' nonlilall' Xiin Chioza', bich nchoglo che' sak'zi'e, san beena' bi nonlilalleene', ba nchoglo che' kwiayee daa bi nonlilallee Xiin tlish' tyaj Chioza'.

19 Ba nchoglo kwiayi' ben' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel cholā' aga ka beeni'na'.

20 Yog' ben'ka' chon diika' bi yejni'alallii chakzbangakile' beeni'na', na' aga will-jabig'lat'gake' lawinna' daa chllebgake' wli'lawi dii mala' chongake'.

21 San ben'ka' zoagake' chongake' ka na dill' li che Chioza', chbig'gake' lao beeni' che'na' kwenche gakbia' chongake' ka cheeni Chioza'.

Juanna', beena' bchoa ben' nisa', be'che' xtill' Jesúza'

22 Ka wde, wyaj Jesúza' Judeana' len ben'ka' nakgake'ne' txen na' wzoagake' na' xtit wen, na' bchoagake' ben' nis.

23 Na' Juanna' lekzka' chchoe' ben' nis gana' le Enón, gaozə gana' le Salim, la' na' de nis zil, na' chaj ben' kwenche chchoe' legake' nisa'.

24 Diiki gokgakan kana' zi' koogake' Juanna' lillyana'.

25 Na'ch ben'ka' nakgake' Juanna' txen gokdil-lengake' sto ben' Israel ni cheyi diika' yoologake' chongake' kwenche chixi chiyechgake' lao Chioza'.

26 Na' wyajgake' jellgake' Juanna':

—Maestro, beena' wzeleno' shlaa yao Jordanna', beena' bi'o xtilleena', ba chchoe' ben' nis na' yog'zə ben' chajgake' kwite'na'.

27 Na'ch che' Juanna' legake':

—Kono gak bi gon shi Chioza' bi wi'e latj.

28 Kwinkzle benile kana' wnia' aga nadaan Crístona', beena' chbezcho wsel' Chioza', san nak' to beñ' bselee kwenche kwialoa' lawe'na' na' yep' beñ' wzenaggake' che'.

29 To ga chak wishagna', bi'na' chshagnan' ikaab' noola'. Na' bi'na' nllaguib' chi'b' kwitbaa, le chibaib' ka chenib' chshaljb'. Kayen'nan chak cha', le chibaid' daa chzenaggake' che Crístona'.

30 Len' zizikchli seyi che', na' nad' bichtek seyi cha'.

Beena' za' yabana'

31 'Ka nak beena' za' yabana', len' zak'chi' aga ka yog'lol beñ'. Na' beñ'ka' lle' yell-lioni, chinogake' daa de lo yell-lionizə, na' che yell-lionizə choe'gake' dill'. San beena' za' yabana' zak'che' aga ka yog'lolte beñ',

32 na' choe' dill' cheyi diika' ba ben ble'ile' yabana', per balchga beñ' chajle' xtilleena'.

33 Na' nottez beena' chajle' che', chli'e Chioza' cho'e dill' li.

34 Beena' bsel' Chioza', cho'a xtill' Chiozan' cho'e, la' Chioza' no'ene' do ka nak Espíritu che'na'.

35 Chioza' chakile' Xiñe'na', na' ba bene' lall' nee yog'lolte dii de.

36 Na' beena' gonlilall' Xiñ Chioza' gat' yel' mban che' zejli kañi. Per beena' bi cheeni gonlilalleene' bi gat' yel' mban che' zejli kañi, san ile'ile' yel' zak'zi'na' we' Chioza'.

4

Bshajlen Jesúza' to nool Samaria

¹ Fariseoka' gokbe'gakile' beṅ' zanch nakgake' Jesúza' txen, na' beṅ' zanch chchoe' nisa' aga ka Juanna',

² la'kzi aga kwin Jesúzan' bchoe' beṅ' nisa', san beṅ'ka' nakgake'ne' txenan.

³ Na' ka gokbe'i Jesúza' ba nezi fariseoka' beṅ' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

⁴ Na' kwenche yilline' gana' mbani Galileana' chiyal' yidie' gana' mbani Samáriana'.

⁵ Na' billingake' to yell dii le Sicar, daa llia gana' mbani Samáriana'. Na' yella' llian gaozə gana' de yell-liona' be' dii Jacoba' xiine' dii Joséna'.

⁶ Na' lo yell-liona' llia posa' wden dii Jacoba'. Na'ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill.

⁷⁻⁸ Na' beṅ'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Beṅ lat' nis yeej'.

⁹ Na'ch che' noolə Samáriana'ne':

—¿Berache chṅabzilo' nad' nisa' yeejo'?, la' beṅ' Israel li', na' nool Samaria nad'.

Golle' ka' la' beṅ' Israelka' bi zoalengake' wen beṅ' Samáriaka'.

¹⁰ Na'ch che' Jesúza'ne':

—Shel'ka' nezshailo' daa choṅ Chioza' na' no nad' chṅabid' li' nisa' yeej', ba wṅabilo' nad' goṅ daa

yeejo', shel'ka', la' nap' to nis yaa nis ban daa gon li'.

¹¹ Na' noola' chi'ene':

—Ben'do', bibi noxoo wlepilo' nisa', na' posi le zitjan. ¿Gara llxi'o nis yaa nis banna' gono' nad' nazo'ka'?

¹² Dii xoxxto'cho Jacoba' bkwaanlene' neto' posi gani weeje', na' weej xiine'ka' na' bayix' che'ka'. ¿Achakilo' zak'chilo' ka le'?

¹³ Na' che' Jesúsane':

—Nottezə ben' cheeje' nis che posi, wbilchkzile' dii yoblə.

¹⁴ San beena' yeej nisa' daa wi'ane', aga wbilchile'. La' nisa' daa wi'ane' nakan ka to dii galchga loo yichjall'do'ena' na' gonan ka gat' yel' mban che' zejli kaŋi.

¹⁵ Na'ch che' noola'ne':

—Ben'do', ben' nad' nisa' no' ka' kwenche bich ibilid' na' bich yid beja' ni.

¹⁶ Na' che' Jesúsane':

—Biyaj jəne ben' cho'na', na' dalene' ni.

¹⁷ Na' che' noola'ne':

—Aga no ben' cha' zoa.

Na' Jesúsane':

—Lekzilo' no' ka', aga no ben' cho' zoa.

¹⁸ La' ba gok gay' ben' cho'ka', na' beena' zoaleno' naa ni bi nshagna'lenkzo'ne'. Shlikzan ba wŋio'.

¹⁹ Na'ch noola' chi'ene':

—Ben'do', ba gokbe'id' nako' to ben' chyixjee daa na Chioza'.

²⁰ Dii xoxxto'nto'ka' be'la'ogake' Chioza' lo yaani, na' le' ben' Israel nale chonan byen we'la'ochone' Jerusalenna'.

²¹ Na' che' Jesúsane':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusalénna' kwenc̄he we'la'ole Xacho Chioza'.

22 Le' ben' Samaria ni bi nombia'le non choe'la'ole, san neto' ben' Israel nombia'nto' Chioza', beena' choe'la'onto', la' ladjnto'nan' ichej beena' yisle' ben' kwenc̄he bi kwiayi'gake'.

23 Ba zoa illin lla, wa ba bllinkz llana' ben'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'.

24 Chioza' nake' Espíritu, na' ben'ka' cheengakile' we'la'ogake'ne', chiyał' we'la'ogake'ne' dowalj na' do yichj do lall'gake'.

25 Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wza-njiile' cho' yog' diiki.

26 Na' che' Jesúsza'ne':

—Nad'kzan' beena' no' ka', na' len' chshaljlene' li'.

27 Na' shlak choe'lene' noola' dill', billin ben'ka' nakgake'ne' txen na' bibangakile' daa chshaljlen Jesúsza' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'.

28 Na'ch noola' bkwaane' chee nis che'na' na'zə, na' biyaje' jayelle' ben' wlall che'ka':

29 —Li da lljawiacho to ben' ba wne' nad' yog' diika' ba ben'. ¿Aaga len' Crístona', lla?

30 Na'ch blleshgake' yella' wyajgake' gana' chi Jesúsza'.

31 Na' shlak ziyaj noola' zeyid ben'ka' nak Jesúsza' txen che'gake'ne':

—Maestro, wdao lat'.

³² Na' Jesúza' chi'e legake':

—De to yel' wao cha' daa bi nombia'le.

³³ Na'ch che' ljwell ben'ka' nakgake'ne' txen:

—¿Anti no ba bidwa' dii wdawe', lla?

³⁴ Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'.

³⁵ Le' nazle: “Chyalljch zi tap beo' kwenche yizi' yilapcho.” Per nad' nia' le', li wwiakachi ba de daa yizi' yilapcho.

³⁶ Beena' chyixjee cho'a xtill' Chioza' naa, zaklebile' to ben' ba chilalile' chizi' chilape'. Na' ben'ka' chzenag daa chyixji'e, gat' to yel' mban chegake' zejli kani, na' beena' goz yibalenile' beena' chizi' chilap.

³⁷ Nakan ka dillaa de daa na: “Ben' yoblan chaz na' ben' yoblə chizi' chilap.”

³⁸ Nad' ba bselaa le' lljalaple gana' bi bllaglole gozle, la' le' gonle ka wzenag ben' cho'a xtill' Chioza' daa wdixjee ben' yoblə.

³⁹ Ben' zan ben' Samáriaka', ben'ka' lle' yell Sicara' benlilall'gake' Jesúza' daa goll noola' legake': “Ba wne' nad' yog'te dii ba ben'.”

⁴⁰ Na'ch ka bllingake' gana' chi' Jesúza', got'yogakile'ne' kwenche yigaanlene' legake'. Na' bigaane' na' chop lla.

⁴¹ Na' ben' zanch benlilall'gake'ne' daa bengakile' dillaa cho'e.

⁴² Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na'

nezinto' dii li lekzen' beena' yisla beṅ' yell-lioni
kwenche bi kwiayi'gake'.

Jesúza' biyone' xiṅ to beṅ' wṅabia'

⁴³ Na' ka gok chop lla, bizee biyaje' gana' mbani
Galileana'.

⁴⁴ Kwinkz Jesúza' wne' nan to beṅ' chyixjee daa
che' Chioza'ne' aga no chgoo le' balaan lalle'na'.

⁴⁵ Na' ka billine' gana' mbani Galileana', bleb-
gake'ne' daa ble'gakile' yog' daa bene' Jerusalénna'
ka gol' lṅi Paskwa'.

⁴⁶ Na' dii yoblə wizaj Jesúza' yell Canána' daa lia
gana' mbani Galileana', gana' biyone' nisa' vino.
Na' yella' zoa to beṅ' zakii beṅ' chon llin che beṅ'
wṅabia'na', na' zoa to xiṅne' bi' byo bi shao'b'.

⁴⁷ Na' ka wṅezile' ba billin Jesúza' Galileana' zizee
Judeana'lə, na' wyaje' lawe'na' got'yoile'ne' shaje'
lljayene' bi' che'na' daa ba chakshwetb'.

⁴⁸ Na'ch che' Jesúza'ne':

—Aga wyajle'le cha' shi bibi yel' wak gon' ile'ile.

⁴⁹ Na' beṅ' wṅabia'na' chi'ene':

—Beṅ'do', ben goklen dagach ṅaate, shategali
biṅ' guet bi' cha'na'.

⁵⁰ Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee.

⁵¹ Na' ka ba zoa yilline' lille'na' jatil xmore'ka' le',
che'gake'ne':

—Ba biyaki bi' cho'na'.

⁵² Na'ch wṅabile' legake' ka do bi gor wzolo
chiyakshao'lall'b'. Na' che'gake'ne':

—Daa ṅeji do ka chida to bichejb' dii lana'.

⁵³ Na'ch gokbe'i xabaa biyakshao'lall'b' ka gora' goll Jesúza'ne': "Biyaj jawia. Aga wet bi'na'." Na' le' len yog' ben'ka' zoa lille'na' ben'lilall'gake' Jesúza'.

⁵⁴ Dga gok de wchopi yel' wakka' ben Jesúza' Galileana' ka zizee Judeana'.

5

Biyon Jesúza' to ben' net ni'a nee

¹ Ka wde gok diiki, gol' to lni che ben' Israelka' Jerusalénna', na' biyaj Jesúza' lina'.

² Na' Jerusalénna', gaozə cho'a puerta' le Puert Che Xil'ka' llia to tang dii le Betesda dill' hebreo. Na' gay' koridor nechjan tanga'.

³ Na' loo koridorka' de ben' zan ben' we', no ben' lchol, no ben' bi chak sa' wen, na' no ben' net ni'a nee, chbezgake' ta nisa'.

⁴ La' zoa kat' chetj to anjl cho'a tanga' chte' nisa', na' beena' chyobi cho'e loo nisa' chiyoll chta anjla'n chiyakile' bittezə yillwe' che'ile'.

⁵ Na' ladj ben'ka' lle' na' len to ben' ba gok shin'shonichoa yiz bi shawee.

⁶ Na' ble'i Jesúza'ne' na' gokbe'ile' ba wlla die' ka', na'ch chi'ene':

—¿Acheenilo' yiyakilo'?

⁷ Na'ch beena' bi shao' chi'ene':

—Ben'do', aga no zoa cha' wletje' nad' loo nisi kat' chdan. Na' kat' chakid' yetj' loo nisa', ben' yoblə lii chjsho'tie' lo'inna'.

⁸ Na'ch che' Jesúza'ne':

—Biyas, bitob daa cho'na' biyoo'n na' bigoo nez.

⁹ Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'.

10 Na' ben'ka' chn̄abia' ben' Israelka' gollgake' beena' biyaki:

—Lla chombaanchō naa. Aga bi lsens de woo daa cho'na'.

11 Na'ch che' beena' legake':

—Beena' biyone' nad' len' wne': “Bitob daa cho'na' biyōa'n na' bigoo nez.”

12 Na'ch che'gake'ne':

—¿Nora beena' wna li': “Bitob daa cho'na' biyōa'n na' bigoo nez”?

13 Na' beena' biyaki aga nezile' non biyon le', la' Jesúza' ba bikwase' ladj ben'ka' lle' na'.

14 Na'tech billag Jesúza'ne' lesh' chyoodo'na', na' chi'ene':

—Ba biyakilo' naa. Bich bi dii mal gono' kwēche ki wtilcho' dii walch.

15 Na'ch beena' biyaje' lao ben' wñabia' che ben' Israelka' jayelle' legake' nan Jesúza' biyone'ne'.

16 Na' daa ben Jesúza' yel' waka' lla sabda', llana' chombaangake', goklall'gake' witgake'ne'.

17 Na' Jesúza' chi'e legake':

—Xa'na' bittezə lla chone' llin na' ka'kzə nad'.

18 Na'ch ben' wñabia' che ben' Israelka' goklall'gake' witgake'ne' aga toz daa wdishje' leya' daa cho'en dill' che llana' chombaangake', san lekzka' daa chon kwine' ka Chios daa chi'e Chioza' nake' Xe'.

Yel' wñabia' daa nap Xiin Chioza'

19 Na' Jesúza' chi'e legake':

—Dii li nia' le', nad', Xiin Chios, aga bi gak gon' tobialoz', san daa chle'id' chon Xa'nan' lekzannan' chon'.

20 La' Xa'na' chakile' nad' na' chliile' nad' yog' diika' chone'. Na' wli'chile' nad' dii zak'techlæ ka diiki, dii gonan ka yibanchile.

21 Ka chon Xa'na' chisbane' beṇ' wetka' na' chiyo'e yel' mban chegake', ka'kzə chon nad', Xiine', cho'a yel' mban che nottezə beṇ' cheenid' wi'an.

22 Na' Xa'na' aga ga chchogloe' che beṇ', san nad' nak' Xiine', ba bene' lall' na' wchogloa' che yog'lol beṇ'.

23 Bene' ka' kwenche yog' beṇ' koogake' nad' balaanna' ka daa chgoogake' Xa'na'. Beena' bi chgwee nad' balaan, nad' nak' Xiin Chios, lekzka' bi chgwee Xa'na' balaan, beena' bsel' nad'.

24 'Dii li nia' le', beena' chzenag xtillaana' na' chonlilallee beena' bsel' nad', gat' yel' mban che' zejli kani. Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin.

25 Dii li nia' le', wllin lla kat' beṇ' wetka' yengakile' inia' legake', nad' nak' Xiin Chios, na' beṇ'ka' yengakile' kat' inia' na' yibangake'.

26 Xa'na' nape' yel' wak kwenche wi'e yel' mban che beṇ' daa bi te cheyin. Ka'kzə ba bene' nad' Xiine' yel' wak kwenche wi'a yel' mban che beṇ' daa bi te cheyin.

27 Na' lekzka' ba bene' nad' yel' wnabia' kwenche gon' yel' joschis daa nak' Beṇ' Bsel' Chioza' Yellioni.

28 Bi yibanile daa nia' ka', la' wllin lla wllin gor yeni yog'te beṇ' wetka' kat' inia' legake'.

29 Na' ka yengakile' inia' na'ch yichejgake' loo bana'. Na' beṇ'ka' ben dii wenna' yibangake' na'

si'gake' banez to yel' mban daa bi te cheyin, na' beñ'ka' ben dii mala', yibangake' na' choglo tegake' lo yel' zak'zi'na' zejli kañi.

Jesúza' bli'e yel' wñabia' che'na'

³⁰ 'Ni to bibi gak gon' tobia'loz', san chchogloa' che beñ' kon ka nllia Chioza' bia' gon', na' kon ka nakannan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lennan' chon'.

³¹ Na' shi nad' wi'a dill' che kwini, nezid' aga no shajle' cha'.

³² San zoa to beñ' cho'e xtilaana', na' nezid' daa ne' cha' nakan shlichá.

³³ Le' bsel'le beñ' janabgakile' Juanna' bi ka iné' cha', na' dillaa daa bi'e cha' nakan dii li.

³⁴ La'kzi nad' bi chyalljid' we' beñ' yell-lioni xtilaa; nia' le' diiki kwenche yilale na' bi kwiayi'le.

³⁵ Juanna' goke' ka to yi' dii bzeeni' na' le bibaile bzenagle che' tolde.

³⁶ Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'.

³⁷ Xa'na', beena' bsel' nad', lekzka' ba bi'e dill' cha'. Ni shlin bigan' yenile inie' ni bin' ile'ilene' nak nake'.

³⁸ Na' cho'a xtilleena' bin' sho'n loo yichjlall'do'lena', la' bi chajle'le cha', nad' beñ' bselee.

³⁹ Le' chsedchgale Cho'a Xtill' Chioza' daa chakile le'inna' yillelile naklə ka gonle kwenche gat' yel' mban chele zejli kañi. Na' la'kzi Cho'a Xtill' Chioza' choe'n xtilaana',

⁴⁰ aga cheenile gake nad' txen kwenc̄he gat' yel' mban c̄hele daa bi te c̄heyin.

⁴¹ 'Aga chyalljid' no koo nad' balaan.

⁴² Na' nombia' le', na' nezid' aga chakile Chioza'.

⁴³ X̄a' Chioza' bselee nad' na' ba bid', na' bi chzenagle c̄ha'. San shi yid ben' yoblə tobia'loze', beena'lan le gake c̄hele.

⁴⁴ ¿Nakrakzə gonle shajle'le c̄ha'? La' gangazə chgoo ljwell-le balaan, na' bi chinole sho'le balaan c̄he beena' zeelo nak Chios.

⁴⁵ Bi gakele nad' gaw' xya c̄hele lao X̄a' Chioza', la' zoa sto ben' gawe' xya c̄hele. Dii Moiséza', beena' nonle lez gaklene' le', len' gawe' xya c̄hele lao X̄a' Chioza'.

⁴⁶ La' shel' chajle'le daa bzej dii Moiséza', lekzka' wyajle'le c̄ha', shel'ka'. La' len' bzeje' xtillaana'.

⁴⁷ Na' daa bi chajle'le c̄he daa bzej dii Moiséza', ¿nakra gonle shajle'le c̄he diiki nia'?

6

Bwao Jesúsza' wdeli gayaa mil ben'

(Mt. 14:13-21; Mr. 6:30-44; Lc. 9:10-17)

¹ Na' ka wde, Jesúsza' wyaje' shlaa nido' c̄he Galileana', daa lekzka' le nido' c̄he Tiberias.

² Na' ben' zan janogake'ne' daa ble'gakile' yel' wakka' bene' kana' biyone' ben'ka' bi shao'.

³ Na'ch wyep Jesúsza' to lo yaa na' wche'lene' ben'ka' nakgake'ne' txen.

⁴ Na' ba zoa gal' lni Paskw c̄he ben' Israelka'.

⁵ Ka ble'i Jesúsza' ben' zan ba bllin gana' chi'e, na' chi'e Felípena':

—¿Gara lljxi'cho dii gao yog' ben'ki?

6 Golle' ka' daa chakile' la'shki bi yee Felípena', la' ba nezkzile' nakan gone'.

7 Na' Felípena' chi'ene':

—Aga waki laxj to ben' che xon' beo' lljxi'yicho dii gao yog' ben'ki lat' wej.

8 Na' sto beena' nak Jesúza' txen lie' Andrés, ben' bish' Simón Pédróna', chi'ene':

9 —Ni ze to bi' xkwid' no'ab' gay' yetxtil de cebada na' zi chop bel. Per bizə daa par yog' ben'ki.

10 Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil.

11 Na'ch beḡ' Jesúza' yetxtilka', na' bi'e Chioza' yel' choḡken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' axt ka beljgakile'. Na' lezkza' bene' che belka'.

12 Na' ka beljgakile', na'ch chi'e ben'ka' nakgake'ne' txen:

—Li yitop yog'lol dii lao'ka' bichoonan kwenche bibi gaktitj.

13 Na'ch bitopgake'n, biyakte shllin xet' diika' bichoonan lao yetxtilka' gay'.

14 Na' ka ble'i ben'ka' yel' waka' daa ben Jesúza', na'ch che' ljwellgake':

—Dii li beenin nake' beena' llia bia' yid yell-lioni kwenche chixji'e daa che' Chioza'ne'.

15 Na' daa gokbe'i Jesúza' cheengakile' yiche'gake'ne' kwenche wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

Wza' Jesúza' lo nido'na'
(Mt. 14:22-27; Mr. 6:45-52)

¹⁶ Ka ba chal, beŋ'ka' nak Jesúza' txen biyetjgake' cho'a nido'na'.

¹⁷ Na' biyoogake' to loo barkw kwenche zija-jgake' yell Capernaúma'. Ba goł na' biŋ' yillin Jesúza' kwite'ka'.

¹⁸ Na'ch wzolo wzechga be'na' na' wzolo chas chat' nido'na'.

¹⁹ Na' ka do gay' wa xop kilómetro ba wza'len barkwa' legake' lo nido'na' kat' ble'gakile' Jesúza' zeje' tlo nido'na' zjatile' barkwa' na' le blleb'gake'.

²⁰ Na' Jesúza' chi'e legake':

—Nad'kzan, įbi illeble!

²¹ Na' chibagakile' bigoogake'ne' loo barkwa', na' lii bllintekz'gake' gana' chwiagake' illingake'.

Zan beŋ' chiyiljgake' Jesúza'

²² Na' betiyo gokbe'i beŋ'ka' bigaan shłaa nido'na' nan tochga barkwa' got' na' to beŋ'ka' nonz Jesúza' txen biyoogake'n na' bi len Jesúza' biyoolene' legake'.

²³ Na' gaozə gana' wdaogake' yetxtilka' ka wde be' xancho Jesúza' Chioza' yel' choxken, bllin sto chop barkw dii za' yell Tibériaza'.

²⁴ Na' ka gokbe'i beŋ'ka' aga no Jesúza' nła' ni beŋ'ka' nakgake'ne' txen, na'ch biyoogake' loo barkwka' ziyajgake' Capernaúma' jadiljgake'ne'.

Jesúza' nake' ka to yel' wao dii chona'n yel' mban

²⁵ Na' ka bllingake' shłaa nido'na' jadi'gake'ne', na' gollgake'ne':

—Maestro, įbat biyedo' ni?

²⁶ Na' Jesúza' chi'e legake':

—Dii li nia' le', chiyilje nad' aga daa wya-jni'lati'le bi zejin yel' wakka' benan', san daa wdaozle axt ka beljilen.

²⁷ Bi yilal yizodzile kwenche gat' dii yeej gaole, la' dii te cheyin nak daa. San li gal' kwe'no daa gon yel' mban chele zejli kani, daa gon' nad', Ben' Bsel' Chioza' Yell-lioni. La' Xa' Chioza' ba bene'n lall' na' wi'an.

²⁸ Na' che'gake'ne':

—¿Beran chiyal' gonnto' kwenche gonnto' daa cheeni Chioza'?

²⁹ Na' che' Jesúza' legake':

—Daa cheeni Chioza' gonle, gonlilall'le nad', ben' bselee.

³⁰ Na'ch che'gake'ne':

—¿Bera yel' wak gono' ile'into' kwenche shajle'nto' cho'? ¿Bi ka gono'?

³¹ Dii xozxto'choka' wdaogake' daa le maná latja' gana' bibi chashj chleb, ka na Cho'a Xtill' Chioza' gana' na: “Yel' wawa' daa za' yabana' bi'en wdaogake'.”

³² Na' che' Jesúza' legake':

—Dii li nia' le', aga dowaljyen' yel' wao daa za' yabanan' be' dii Moiséza' legake', san Xa'na' chone' daa nak dowalj yel' wao daa za' yabana'.

³³ La' nad', ben' za' yabana', nak' ka to yel' wao dii choe' Chioza' ben' yell-lioki kwenche iban-gake'.

³⁴ Na'ch che'gake'ne':

—Ben'do', bengach neto' toshiizi yel' wawa' no' ka'.

³⁵ Na' che' Jesúza' legake':

—Nad' nak' ka yel' wawa' daa choe'n yel' mban che ben'. Beena' gake' nad' txen, gake' ka ben' nelj nlla'i toshiizi. Na' beena' gonlilallee nad', gake' ka to ben' bichga ibili.

³⁶ Per kon ka ba wnia' le', la'kzi ba ble'ile nad' bi chajle'le.

³⁷ Yog' ben'ka' chon Xa'na' lall' na', gakgake' nad' txen. Na' beena' gake' nad' txen aga wzoa'ne' ka'lə.

³⁸ La' zaa yabana' na' zoa' yell-lioni aga kwenche gon' daa nazan chan', san zaa kwenche gon' daa cheeni Xa'na', beena' bsel' nad'.

³⁹ Na' Xa'na', beena' bsel' nad', cheenile' bi wi'a latj kwiayi' ni to ben'ka' ba wleje' kwenche gakgake' nad' txen. San cheenile' yisban' legake' ladj ben' wetka' kat' illin lla te che yell-lioni.

⁴⁰ Na' dgan cheeni Xa'na', beena' bsel' nad': chaklallee gat' yel' mban zejli kani che yog'lol ben' gakbe'i nak' Xiine' na' gonlilallee nad'. Na' nad' yisbanee ladj ben' wetka' kat' te che yell-lioni.

⁴¹ Na'ch ben' wñabia' che ben' Israelka' wzologake' biz chon chnagake' che Jesús'a daa wne': "Nad' nak' yel' wao daa za' yabana'."

⁴² Na' che'gake':

—¿Aga beenin Jesús, xiin Joséna'? Nombia'cho xaxna' beeni. ¿Berache naze': "nad' za' yabana'?"

⁴³ Na'ch che' Jesús'a legake':

—Bibi gon inazle cheyi daa wnia' le'.

⁴⁴ Ni to kono gak gon nad' txen shi Xa'na', beena' bsel' nad', bi gone' le' lall' na'. Na' ben'ka' nak nad' txen, yisban' legake' kat' te che yell-lioni.

⁴⁵ Lee librka' bzej dii ben'ka' wdixjee daa goll Chioza' legake' kani'yi nan: "Chioza' wli' wsedile'

yog'lolte ben'." Na' yog' ben' chzenag che Xa'na' na' chajni'gakile' daa ne', legaken' chongake' nad' txen.

⁴⁶ Aga ga zoa ben' ba ble'ile' Xa'na'; toz nad', ben' za' yabana', ba ble'idee.

⁴⁷ Dii li nia' le', nottez ben' nonlilallee nad' de yel' mban che' zejli kani.

⁴⁸ Nadaan nak' ka yel' wawa' daa choe'n yel' mban che ben' zejli kani.

⁴⁹ Dii xozxto'leka' wdaogake' daa le maná latja' gana' bibi chashj chleb na' bia'kzə witgake'.

⁵⁰ San nad' cho'a dill' che yel' wao daa za' yabana', na' beena' gawe'n aga bi yel' wit zejli kani ile'ile'.

⁵¹ Nadaan nak' yel' wao daa za' yabana' daa cho'en yel' mban che ben'. Beena' gao yel' wawi, ibane' zejli kani. Na' yel' wawa' daa wi'ane', lennan' beli chen cha'ni daa chzanid' kwenche gat' yel' mban che ben' yell-lioni.

⁵² Na'ch ben' Israelka' wzolo chshesh chnegake', che' ljwelle':

—¿Nakra gon beeni gone' beli chen che'na' gaochon?

⁵³ Na' che' Jesúsza' legake':

—Nad', Ben' Bsel' Chioza' Yell-lioni, dii li nia' le', shi bi gaole kwerp cha'ni na' shi bi yeejle chen cha'ni, aga wat' yel' mban chele daa bi te cheyin.

⁵⁴ La' ben'ka' gaogake' kwerp cha'ni na' yeejgake' chen cha'ni, ben'kan' gat' yel' mban chegake' zejli kani. Na' kat' illin lla te che yell-lioni, nad' yisban-gakee ladj ben' wetka'.

⁵⁵ La' kwerp cha'ni nakan dowalj yel' wao, na' chen cha'ni nakan dowalj dii cheeje'.

⁵⁶ Beena' gao kwerp cha'ni na' yeeje' chen cha'ni, nake' nad' txen, na' lekzka' nad' nakee txen.

⁵⁷ Xa'na', beena' bsel' nad', zoe' zejli kani na' de yel' mban cha' daa mbane' le'. Na' ka'kzan beena' gao beli chen cha'ni ibane' daa wi'ane' yel' mbanna'.

⁵⁸ Beli chen cha'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii xozxto'leka' na' bia'kzə witgake'. Beena' gao yel' wawa' daa za' yabana', ibane' zejli kani.

⁵⁹ Diikin wna Jesúza' shlak bli' bsedile' beñ' gana' chdop chllag beñ' Israelka' choe'lwillgake' Chioza' yell Capernaúma'.

Dill' dii nsa'yel' mban

⁶⁰ Na' zan beñ'ka' nogake'ne', ka bengakile' daa wna Jesúza', na' wnagake':

—Lallj inleeb nak dga chli' chsedi beeni. ¿Notgui gon ka ne'?

⁶¹ Na' Jesúza' gokbe'ile' bi wyazlall'gake' xtillee'na', na'ch wñabile' legake':

—¿Achakzbanile dga ba wnia' le'?

⁶² ¿Nakra gonle shel'ka' ile'ile nad', Beñ' Bsel' Chioza' Yell-lioni, yiyep' gana' wzaa?

⁶³ Espíritu che Chioza' cho'e yel' mban che beñ', la' beli chenna' aga bi zakiin. Dill'ka' ba wnia' gonan ka soalen Espírituna' le' na' gat' yel' mban chele.

⁶⁴ Per bia'kzə zoa ba_l-le bi chajle'le.

Goll Jesúza' legake' ka', la' dezd nechte ba nezkzile' no beñ'ka' bi chajle' che' na' non gon le' lo na' beñ' malka'.

⁶⁵ Na' chi'e legake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

⁶⁶ Na' lo llana'tez beṇ' zan beṇ'ka' nakgake'ne' txen bkwasgake' bich janogake'ne'.

⁶⁷ Na'ch che' Jesúza' beṇ'ka' shllin, beṇ'ka' nakgake'ne' txen:

—¿Alezkza' lenle cheenile yiyajle?

⁶⁸ Na' Simón Pédróna' chi'ene':

—Xan', aga nochlə cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kaṇi.

⁶⁹ Ba wyajle'nto' cho', na' nezinto' lin' Crístóna', Xiin Chios yaa Chios banna'.

⁷⁰ Na' Jesúza' chi'e legake':

—Ba wlej' shllinle gakle nad' txen. Per tole nakle dii xiwaa txen.

⁷¹ Wne' ka' che Jud Scariota', xiin to beṇ' le Simón, la' nezile' nan Juda' gone'ne' lall' na' beṇ' malka', la'kzi wlene' beṇ'ka' shllin.

7

Beṇ'ka' nak beṇ' bish' golj Jesúza' bi wyajle'gake' che'

¹ Ka wde dga, Jesúza' wde' doxen gana' mbani Galileana'. La' bi goklallee shaje' gana' mbani Judeana' daa cheeni beṇ' wṇabia' che beṇ' Israelka' witgake'ne'.

² Na' ka ba zoa gal' lni che ranshdo'ka' daa chon beṇ' Israelka' yog' yiz,

³ beṇ'ka' nak beṇ' bish' golj Jesúza' che'gake'ne':

—Bi yigaano' nizə, san wyaj Judeana' kwenche beṇ'ka' ba non li' txen ile'gakile' yel' wakka' chono'.

⁴ *La'* beena' cheeni seyi *che'*, aga *chkwashee* *diika'* chone'. *Bachgali* chono' *yel'* wakki, *jentegan* *lao* *yog'* *lol* *ben'*.

⁵ *La'* ni *ben'* *bisheekan'* bi *wyajle'* *gake'* *che'*.

⁶ *Na'* *ch* *che'* *Jesúza'* *legake'*:

—*Bin'* *illin* *lla* *illin* *gor* *gon'* *daa* *llia* *bia'* *gon'*. *San* *le'*, *bat'tez* *wak* *shajle*.

⁷ *Ben'* *yell-lioki* *bibi* *de* *dii* *gonan* *ka* *gakzbangak-* *ile'* *le'*, *san* *nadaan* *chakzbangakile'* *daa* *chepga-* *kee* *malan'* *chongake'*.

⁸ *Li* *shaj* *le'* *lnina'*. *San* *nad'* *bi* *saa*, *la'* *bin'* *illin* *lla* *illin* *gor* *gak* *cha'* *daa* *llia* *bia'*.

⁹ *Biyoll* *golle'* *legake'* *ka'* *na'* *bigaane'* *Galileana'* *zi* *xtit*.

Wyaj Jesúza' lnina'

¹⁰ *Na'* *ka* *wde* *wza'* *ben'* *bisheeka'*, *lekzka'* *wzee* *wyaje'* *lnina'* *do* *ngash'z*.

¹¹ *Na'* *ben'* *ka'* *chnabia'* *ben'* *Israelka'* *chiyilj-* *gake'ne'* *lo* *lnina'*, *che'* *ljwellgake'*:

—*¿Garanzi* *beena'*, *lla'*?

¹² *Na'* *ladj* *ben'* *ka'* *lle'* *lnina'*, *ben'* *zan* *choe'gake'* *xtill'* *Jesúza'*. *Bale'* *che'*: “*Nake'* *ben'* *wen*.” *Na'* *zi* *bale'* *che'*: “*Bi* *nake'* *ben'* *wen*, *la'* *chdaze'* *chziyee* *ben'*”

¹³ *Per* *ni* *to* *kono* *biyaxji* *we'* *xtill'* *Jesúza'* *ka* *nla'z* *daa* *chllebgake'* *ben'* *ka'* *chnabia'* *ben'* *Israelka'*.

¹⁴ *Na'* *ba* *zej* *shon* *tap* *lla* *chak* *lnina'* *ka* *bllin* *Jesúza'* *gana'* *zoa* *yoodo'na'* *na'* *wzoloe'* *chli'* *chsedile'* *ben'*.

¹⁵ *Na'* *chibani* *ben'* *Israelka'*, *na'* *che'* *ljwelle'*:

—*¿Nakra* *chak* *chli'* *chsedile'* *beeni* *ben'*, *len* *aga* *bi* *nsede'*?

¹⁶ *Na'* *che'* *Jesúza'* *legake'*:

—Diika' chli' chsedid' aga nakan dii chyiljall'z', san beena' bsel' nad', len' bli' bsdile' nad' diiki.

17 Nottez ben' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chyiljall'z'.

18 Beena' tobialoze' cho'e xtillee, balaan che kwinzen' chyilje', san beena' chyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

19 'Dii Moiséza' bene' le' ley che Chioza', na' ni tole bi chonle ka nllian bia' gonle. ¿Biche cheenzile witle nad'?

20 Na'ch ben'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

21 Na' che' Jesúsza' legake':

—Tochga yel' waka' ba ble'ile ben' llana' chombaanchon na' yog'le chibanile.

22 Dii li dii Moiséza' bene' byen yog'tele nakle ben' byo chiyal' sho'le sen daa le circuncisión, la'kzi aga len' wzololene'n, san dii xozxto'leka'ten. Daan chgoole bi' byodo'ka' sen'na' la'kzi nakan lla chombaanchon.

23 Na' shi choe'le latj sho' bi' byodo'ka' sen daa le circuncisión lo llana' chombaanchon kwenche gak ka na leya' daa bzej dii Moiséza', ¿biche chllaazle nad' daa biyon' to ben' llana' chombaanchon?

24 Bi wchoglizle che ben' shi bi chle'ile chone', san cheenin inezile nakyen'an nakan kwenche we'le dill' kon ka nakan.

Jesúsza' wne' zee gana' zoa Chioza'

25 Na'ch bal ben' Jerusalénka' nagake':

—¿Aaga beenin cheengakile' witgake', lla?

26 Li wwia ka cho'e dill' ladj lkwe' beṅ', na' ni to kono bi che'. ¿Anti ba chajle' lzə beṅ' wṅabia'ka' nan dii li beeni nake' Crístona', beena' wsel' Chioza' inabi'e, lla?

27 Cho' nezicho ga beṅ' beeni. San kat' yid beena' nak Crístona', ni to kono inēzi galə za' beena'.

28 Jesúza' chli' chsedile' beṅ'ka' yoodo'na', na' ka benile' daa wna beṅ'ka' che', na' wṅie' zillj chi'e:

—Chakzile nombia'le nad' na' nezile ga beṅ' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene',

29 san nad' nombi'ane', la' gana' zoen' wzaa, na' len' bselee nad'.

30 Na'ch bale' goklall'gake' gox'gake'ne', per ni toe' bi beṅ' le', la' bin' illin lla illin gor gak che' daa llia bia'.

31 Na' beṅ' zan wyajle'gake' che', na' wnagake':

—Kat' yid beena' nak Crístona', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

Goklall'gake' gox'gake' Jesúza'

32 Na' fariseoka' bengakile' dillaa daa choe' beṅ'ka' che' Jesúza'. Na' legake' len' bxozka' chṅabia' bsel'gake' beṅ'ka' chap yoodo'na' kwenche lljex'gake' Jesúza'.

33 Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'.

34 Na' yiyilje nad' per aga willelile nad' daa bi gak yidle gana' lljazoa'.

35 Na'ch beṅ' Israelka' che' ljwellgake':

—¿Garan yiyaj beeni na' bich yillelichone', lla?
 ¿Anti gana' lle' beñ' wlall chechoka', beñ'ka' lle'
 lall beñ' zit'kan' shaje' kwenche llasedile' beñ'
 griegoka', lla?

³⁶ ¿Beran zejin daa ne': "Yiyilje nad', per aga
 willelile nad' daa bi gak yidle gana' lljazoa"?"

Espíritu che Chioza' nake' ka nis yaa nis ban

³⁷ Na' llana' zeelo gok lñina', llana' nak lla choo
 lla xen, wzolla' Jesúza' na' wñie' zillj, chi'e:

—Shi nole chbili, li da yeejle nisa' daa gon' le'.

³⁸ Na' gak kon ka na Cho'a Xtill' Chioza' gana' nan
 beena' gonlilallee nad', gak loo yichjlall'do'ena' ka
 ga chaltit nis yaa nis ban.

³⁹ Na' daa wna Jesúza' ka', zejin soa Espiritu che
 Chioza' loo yichjlall'do' beena' gonlilall' le'. La' ka
 gora' biñ' yidsoa Espirituna' loo yichjlall'do' beñ'
 daa biñ' sho' Jesúza' balaanna' daa llia bia' sho'e
 kat' yiyepe' gana' zoa Chioza'.

Gok beñ'ka' chop shon kwenla

⁴⁰ Na' bal beñ'ka' bengakile' daa wna Jesúza' na'
 wnagake':

—Dii li beeni nake' beena' llia bia' yid kwenche
 chixji'e daa che' Chioza'ne'.

⁴¹ Na' zi bale' che'gake':

—Beenikzan' Crístona', beena' chbezcho wsel'
 Chioza' inabi'e.

Na' zi bale' che'gake':

—¿Achakile ladj beñ' Galileaka' ichej beena' wsel'
 Chioza' inabi'e?

⁴² Cho'a xtill' Chioza' nan lo dia che dii Davina'
 galj beena' nak Crístona', na' gake' beñ' yell Belén
 ka dii Davina'.

43 Ka' gok, gokgake' chop shon kwenlə ni che Jesúza'.

44 Bale' goklall'gake' gox'gake'ne', per ni toe' bi biyaxji.

Ben'ka' wnabia' ben' Israelka' bi wyajle'gake' che Jesúza'

45 Na'ch ben'ka' chap yoodo'na' billingake' gana' zoa fariseoka' len b̄oxzka' ch̄nabia'. Na'ch che'gake' legake':

—¿Bi che bi b̄che'lene'?

46 Na' ben'ka' chap yoodo'na' che'gake':

—Ni to konon' we' dill' ka dillaa choe' beena'.

47 Na'ch che' fariseoka':

—¿Alezkza' lenle ba wxiyee?

48 Ni to ben' wnabia' chechoka', ni neto' fariseo bi chajle'nto' che'.

49 Per ben'ki bi nombia'gake' leya', ba wllia-ayi'gake'.

50 Na' farisewa' le Nicodemo, beena' wyaj lao Jesúza' wal-lə, chi'e legake':

51 —Ley chechona' nan aga wak w̄choglocho che to ben' in̄acho chone' mal shi bin' wzenagcho dillaa wi'e kwenche in̄ezicho bin chone'. ¿Anti aga kan' nakan?

52 Na'ch che'gake'ne':

—¿Alezkza' ben' Galilea li? Bsed kwenche inezilo' ni to ben' chyixjee daa che' Chioza'ne' bin' ichej gana' mbani Galileana'.

53 Na'ch billeshgake' ziyaj lill che chegake'.

8

Noola' bidol'len ben' byona'

1 Na' Jesúza' wyaje' lo Yaa Olívoza'.

2 Na' betiyo ka wyeeni' wizaje' yoodo'na'. Na' beṅ' zan inleeb wbig' kwite'na', na' wchi'e wzoloe' bli' bsedile' legake'.

3 Na'ch beṅ'ka' chli' chsedi leya' len fariseoka' nche'gake' to noolə bidol'lene' to beṅ' byo, na' bze-gake'ne' ladj beṅ'ka' lle' na'.

4 Na' che'gake' Jesúza':

—Maestro, ba bidolinto' nooli kon to beṅ' byo.

5 Na' neṅzinto' leya' daa bzej dii Moiséza' nan chiyal' witcho noolka' chon ka' kon yaj. ¿Shera li', bi ka ino'?

6 Che'gake'ne' ka' kwenchez kwejgake'ne' dill' ga si' sengake' na' gaogake' xya che'. Na'ch Jesúza' bchekee bzej' lo yona' kon xbene'na'.

7 Na' daa zeyidgake' chṅabgakile'ne', na' bibe'shawee chi'e legake':

—Beena' bibi saaxya che' de, wak soloe' wtakwe'ne' yaja'.

8 Na'ch bizchekee chizzeje' lo yona'.

9 Na' ka goll Jesúza' legake' ka', na' biza' twej tweje', wzolozan beṅ' golka' na'tech beṅ' xk-wid'ka', na' stoz noola' bgaanlene' Jesúza'.

10 Na' bibe'shao' Jesúza' dii yoblə, na' chi'ene':

—Noolə, ¿garan beṅ'ka' chao xya cho'? ¿Ani toe' bibi beni li'?

11 Na' che' noola'ne':

—Ni toe', beṅ'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj wleno'.

Jesúza' nsee beeni' che beṅ' yell-lioni

12 Na'ch Jesúza' bizoloe' choe'lene' ben'ka' lle' na' dill', chi'e:

—Nad' nak' beeni' che ben' yell-lioni. Beena' gone' nad' txen bich soe' lo yel choi che dii mala', san loo yichjlall'do'ena' gape' beeni' daa nsa' yel' mban zejli kani.

13 Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

14 Na' che' Jesúza' legake':

—La'kzi choa' dill' che kwin', nezid' nakan dill' li, la' nezid' gan zaa na' gan yiyaa. San le', aga nezile gan zaa, ni bi nezile gan yiyaa.

15 Le' chchoglole che ben' lega ben' yell-lio. San nad' bi chchogloa' che ben'.

16 Per shi nad' wchogloa' che ben', kon ka nakannan' wchogloa'n, la' aga tobialozaan chchogloa'n, san Xa'na', beena' bsel' nad', naknto' txen chchoglonto' che ben'.

17 Ley chelena' nan shi chop ben' toz ka chitili xtilleeka' chiyal' shajle'cho chegake'.

18 Na' nak chopnto', nad' cho'a dill' che kwin', na' lekzka' Xa'na', beena' bsel' nad', cho'e dill' cha'.

19 Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

20 Jesúza' bi'e dill'ki shlak bli' bsedile' ben' latja' gana' chi' daa chgoogake' mech che yoodo'na', per ni to kono bex' le' daa bin' illin lla bin' illin gor gak che' daa llia bia'.

Jesúza' wne' kono gak yiyaj gana' yiyaje'

21 Na'ch Jesúza' wizi'e legake':

—Nad' yiyaa, na' yiyilje nad', na' gana' yiyaa aga wak sa'le, la' lao saaxya cheleka' guetle.

22 Na'ch beṅ' wṅabia' che beṅ' Israelka' che' ljwellgake':

—¿Acheenile' yiyit kwinen', lla? ¿Adaan naze': "Gana' yiyaa bi gak sa'le"?

23 Na'ch che' Jesúza' legake':

—Le' nakle beṅ' yell-lio, na' nad' zaa yabana'. Le' chonle lega beṅ' yell-lio, san nad' bi chon' ka le' beṅ' yell-lio.

24 Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

25 Na'ch che'gake'ne':

—¿Norakza li', shka'?

Na' che' Jesúza' legake':

—Nadaan nak' beena' ba wṅiakz' le' dii nechte.

26 Dii zan dii gak inia' dii gaogakan xya chele. Per beena' bsel' nad' cho'e dill' li, na' daa wne' nad' lennan' choe'len' beṅ' yell-lioni dill'.

27 Na' legake' aga wyajni'gakile' shi xtill' Xe'nan' choe'lene' legake'.

28 Na' daan chi'e legake':

—Kat' ba bda'le nad', Beṅ' Bsel' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsemi Xa'na' nad', lennan' cho'a dill'.

29 La' Xa'na', beena' bsel' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

30 Na' ka biyoll be' Jesúza' dill'ka', beñ' zan benlilall'gake'ne'.

Ben'ka' chñabia' dii mala'yichjlall'do'eka'

31 Na'ch che' Jesúza' beñ' Israelka' ba chajle' che':
—Shi le' soachehle gonle ka ba wnia', dii li txenan ba nakle nad', shi ñaa.

32 Na' gombia'le dill' li cha'na', na' kat' ba nom-bia'len, gagle ka to beñ' ba biyell bila' lao daa ntakw nchejan le'.

33 Na'ch che'gake'ne':

—Neto' naknto' xiin dia che dii Abrahama' na' axt ñaanlla aga non' inabia' neto' kwenche gonznto' kon daa iné'. ¿Berache nazo' yiyell yila'nto'?

34 Na' che' Jesúza' legake':

—Dii li nia' le', nottez beena' chon dii mala' nake' ka beñ' ndoo lawinna' daa chñabi'an le'.

35 To wen llin aga toshiizi soe' lill xane'na', san xiin xan llinna', toshiizi soe' lill xe'na'.

36 Na' shi nad', Xiin Chios, yisell yilaa le' lawi dii mala', dii li wiyell wila'le lawinna'.

37 Nezkid' nakle xiin dia che dii Abrahama', per cheenile witle nad' daa bi chleble cho'a xtilaani.

38 Nad' cho'a dill' che daa ba ble'id' gana' zoa Xa'na', na' le', chonle ka na xalena'.

39 Na' che'gake'ne':

—Xiin dia che dii Abrahama' neto'.

Na' Jesúza' chi'e legake':

—Shel' nakle dowalj xiin dia che dii Abrahama', kon ka ben dii Abrahama' chonle, shel'ka'.

40 La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahama' agaga bene' ka chonle.

41 Le' chonle kon ka chon xalena'.

Na'ch che'gake'ne':

—Aga naknto' ka to beṇ' bi wyoo xayin. Toz Chioza' nake' Xanto'.

⁴² Na'ch che' Jesúza' legake':

—Shel' lezkile Chioza' nake' Xale, wakile nad' shel'ka', la' kwite'nan' wzaa. Aga tobialozaan bid', san Chiozan' bselee nad'.

⁴³ Na' aga chajniile diika' nia' le' daa bi cheenile wzenagle dill'ka' cho'a.

⁴⁴ Dii xiwaan nak xale na' chibaile chonle daa chaklalliin. La' kana'te dii xiwaa nakan to wen xya, na' ni shlin bin' gonan daa nak shli, ni bi choe'n dill' li. Kat' chziye'n chonan kon ka nan loo lall'do'inna', la' nakan liizelozi dii wxiye' na' nakten xan yel' wxiye'na'.

⁴⁵ Na' nad', daa cho'a dill' lina' aga chajle'le cha'.

⁴⁶ Ni tole bi gak wli'le shi de saaxya cha'. Na' shi cho'a dill' li, ¿berache bi chajle'le cha'?

⁴⁷ Beena' nak xiin Chioza' chzenague' xtilleena'. Na' le', bi chzenaglen daa bi nakle xiine'.

Ba zoakz Crístona' kana' zi' galj dii Abrahama'

⁴⁸ Na'ch beṇ' wṇabia' che beṇ' Israelka' che'gake'ne':

—Aga naznto' nanto' nako' beṇ' Samaria na' yootio' to dii xiw'!

⁴⁹ Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chnit chdele nad'.

⁵⁰ Aga chylj' koo beṇ' nad' balaan. San zoa beena' cheeni sho'a balaan, na' len' chchogloe' che beṇ' kon ka nakan.

⁵¹ Dii li nia' le', beena' chon ka nia', ibane' zejli kani.

⁵² Na'ch beṅ' wṅabia' che beṅ' Israelka' che'gake'ne':

—Naach ba wṅezinto' dii xiw'kzan yoo. Dii xozxto'cho Abrahamama' wite' na' lekzka' yog' beṅ'ka' wdiṅjee daa goll Chioza' legake' kani'yi. Na' li' naa, nazo': “Beena' chzenag cha' ibane' zejli kani.”

⁵³ ¿Achakilo' zak'cho' aga ka dii xozxto'cho Abrahamama'? Le' wite' na' ka'kzə dii beṅ'ka' wdiṅjee daa goll Chioza' legake' kani'yi. ¿Noraka chakzi kwino'?

⁵⁴ Na'ch che' Jesúza' legake':

—Shel' nadaan chgwaa kwina' balaan' aga bi za-kiin, shel'ka'. Per Xa'na', beena' nale nake' Chios chele, len' chgwee nad' balaan'.

⁵⁵ La'kzi bi nombia'lene', nad' nombi'ane'. Shel'ka' nia' bi nombi'ane', na' nak' ka le' beṅ' wxiye'. Per nombi'ane' na' chon' ka ne'.

⁵⁶ Dii xozxto'cho Abrahamama' bibaile' daa wṅezile' ile'ile' llaki zoa' yell-lioni. Na' ba ble'ile'n na' bibaile'.

⁵⁷ Na'ch beṅ'ka' chṅabia' beṅ' Israelka' che'gake'ne':

—Ni shiyon yiz biṅ' gakilo' na' nazo' zle'ilo' dii Abrahamama'.

⁵⁸ Na'ch che' Jesúza' legake':

—Dii li' nia' le', kana' zi' galjte dii Abrahamama', bakz zoa' nad'.

⁵⁹ Na'ch lii wdoyotegake' yaja' nan wtakw-gake'ne'n, per lii bkwash'tie' na' bizee gana' zoa' yoodo'na'. Na' ni bi gokbe'gakile' bidie' ladjeka' ziyaje'.

9

Biyon Jesúza' to beṅ' lchol

¹ Ka zej Jesúza' na' ble'ile' to beṅ' byo beṅ' golje' nḥole'.

² Na' beṅ'ka' nakgake'ne' txen che'gake'ne':

—Maestro, ¿beraḥe golj beeni nḥole', lla? ¿Anḥole' ni ḥe saaxya ḥe'na', anti ni ḥe saaxya ḥe xaxṅeeḥan', lla?

³ Na' ḥe' Jesúza' leḡake':

—Aga ni ḥe saaxya ḥe'nan' ni aga ni ḥe saaxya ḥe xaxṅeeḥan', san kwenḥe wli'lawi yeḷ' wak ḥe Chioza' lo yeḷ' mban ḥe'nan' nake' ka'.

⁴ Shlak ṅaa ni de latj, chiyaḷ' goncho xshin beena' bseḷ' nad'. La' wllin lla kat' kochno bi gak gon.

⁵ Shlak ni zoa' yell-lioni nak' beeni' ḥe beṅ' yell-lioni.

⁶ Na' ka biyoll wna Jesúza' ka', na'ch bḷle' xeneena' lo yona' na' bene' lat' beṅj kon xeneena', na'ch wdebe'n jalao beṅ' lḥola'.

⁷ Na' chi'ene':

—Wyaj jadib jalawo'na' cho'a tanga' daa le Siloé —na' Siloé zejin Beṅ' Nseḷee.

Na'ch wyaj beṅ' lḥola' jadib jalawe'na', na' ka bizee na', ba chle'ile'.

⁸ Na'ch beṅ' wlill ḥe'ka' na' beṅ'ka' ble'gakile'ne' kana' nḥole' che'gake':

—¿Aga beenin chbi'e chṅabe' mecha'?

⁹ Na' bale' che':

—Awe, len'.

Na' zi bale' che':

—Aga len', per ka'tekzə nake'.

Na' beena' chi'e:

—Nad'kzan'.

¹⁰ Na'ch wṅabgakile'ne':

—¿Nakra gok ba chle'ilo'?

¹¹ Na' chi'e leḡake':

—To ben' le Jesús bene' benja' na' wdebe'n jalaw'ki na'ch wne' nad': “Wyaj gana' llia tanga' daa le Siloé na' jadib jalawo'na'.” Na'ch wyaa na' ka biyiba'n, na' gok ble'id'.

¹² Na'ch che'gake'ne':

—¿Garaṅ beena' no' ka?

Na' chi'e legake':

—Bi neṅid'.

Wnabyolli fariseoka' nak gok ble'i ben' lchola'

¹³ Na'ch jwa'gake' beena' gok ben' lchol' lao fariseoka'.

¹⁴ Na' llana' wdeb Jesúza' benja' jalao beena' kwenche ble'ile' nakan lla chombaangake'.

¹⁵ Na'ch fariseoka' lekzka' wṅabgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

¹⁶ Na'ch baḷ fariseoka' che'gake':

—Aga Chiozan' bselee beena', la' chone' daa bi chiyaḷ' goncho llani chombaangcho.

Na' zi baḷe' che'gake':

—¿Nakra gon to ben' saaxya gone' yel' wak ka diiki chon beeni?

Na'ch gokgake' choplə.

¹⁷ Na'ch dii yoblə gollgake' beena' gok ben' lchol':

—¿Sera li'? ¿Bi ino' che beena' ben ka chle'ilo'?

Na' chi'e legake':

—Nad' nia' nake' to ben' chyixjee daa che' Chioza'ne'.

¹⁸ Na' ben'ka' chnabia' ben' Israelka' bi wyajle'gake' shi dii li gok beena' ben' lchol' na' naa ba chle'ile'. Na'ch goxgake' xaxneena',

¹⁹ na' wṅabgakile' legake':

—¿Abeenin xiinlena', beena' nale nchole' ka golje'? Na' ¿nakra gok ba chle'ile' naa, shka'?

²⁰ Na' xaxneena' billigake' xtilleeka':

—Nezinto' beenin xiinnto'na' na' golje' nchole'.

²¹ Per aga nezinto' nak gok chle'ile' naa, ni bi nezinto' non biyon le'. Li inabile', la' aga nake' bi'do' inacho bi gak ine' non biyon le'.

²² Goll xaxneena' ka' daa chlebgake' ben'ka' chnabia' ben' Israelka', la' ba bgaangake' dill' nottezə ben' ine' Jesús'a nake' Crístona' bi wlebgake'ne' gana' chdop chllaggake' choe'lwillgake' Chioza'.

²³ Daan golltezə xaxneena': "Li inabile', la' aga nake' bi'do' inacho bi gak ine' non biyon le'."

²⁴ Na'ch dii yoblə goxgake' beena' gok ben' lchol, che'gake'ne':

—Bzoashki Chioza' de taschiw shi leilo' choo dill' li, la' nezinto' beena' biyon li' nake' ben' saaxya.

²⁵ Na'ch golle' legake':

—Bi nezid' shi nak beena' ben' saaxya. Lete dii nezid', golj' nchol' na' naa ba chle'id'.

²⁶ Na'ch che'gake'ne':

—¿Beran benile' li'? ¿Nak bene' kwenche chle'ilo'?

²⁷ Na' chi'e legake':

—Ba wniakz' le', na' bi chzi'le cho'a xtilaana'. ¿Biche cheenzile inia'n dii yoblə? ¿Anti lekzka' lenle ba cheenile gonlene' txen?

²⁸ Na'ch wnegake'ne' zibia', che'gake'ne':

—Lin' nako' beena' txen, san neto' Moisézan' naknto' txen.

²⁹ Nezinto' Chioza' wnie' Moiséza', san beena', ni bi nezinto' ga zee.

³⁰ Na'ch beena' gok ben' lchol' chi'e legake':

—¡Nakkzan dii yibanicho daa bi ñezile ga za' beena' na' ba bene' ka chle'id'!

³¹ Nezkzicho aga chzenag Chioza' che ben' saaxyaka', san chzenague' che ben'ka' choe'la'ogake'ne' na' chongake' daa chazlallee.

³² Dezd ka wxe wzil yell-lioni bin' yenicho shi zoa ben' chak chone' ka chle'i to ben' golje' nchole'.

³³ Shel' beeni bi nake' to ben' bsel' Chioza', ni to yel' wak bi gak gone', shel'ka'.

³⁴ Na'ch che'gake'ne':

—Dezd ka goljo' nako' ben' saaxya. ¿Ana' chak-ilo' wli' wsedilo' neto'?

Na'ch bibejgake'ne' ladje'ka'.

Ben'ka' nchol nñiti yichjlall'do'eka'

³⁵ Na' wñezi Jesúza' bibej fariseoka' beena' gok ben' lchol ladje'ka', na' ka billague'ne' na'ch chi'ene':

—¿Achonlilalloo Beena' Bsel' Chioza' Yell-lioni?

³⁶ Na' beena' chi'ene':

—Ben'do', wnashki nad' nora beena' kwenche gonlilallaane'.

³⁷ Na' che' Jesúza'ne':

—Ba ble'kzilo'ne', na' lekzen' chshaljleno' naa.

³⁸ Na'ch lii bchek'te xibe'na' lao Jesúza', na' chi'ene':

—Chonlilallaa li', Xan' —na'ch be'laweene'.

³⁹ Na'ch che' Jesúza':

—Ba bid' yell-lioni kwenche wchogloa' che ben' yell-lioni. Zaa kwenche ben'ka' nak ka ben' lchol ile'gakile', na' ben'ka' chakgakile' chle'gakile' yiyakgake' ka ben' lchol.

⁴⁰ Na'ch bal fariseoka' lle' na', ka bengakile' chi'e ka', che'gake'ne':

—¿Achakilo' lennton' naknto' ben' lchol?

⁴¹ Na'ch che' Jesúza' legake':

—Shel' nakle ben' lchol, aga bi xtol'le de, shel'ka'.
Per daa nale chle'ile, daan de xtol'le.

10

Jempl che leej che xil'ka'

¹ 'Dii li nia' le', beena' bi choo cho'a leej che xil'ka' san chiyiljallee cho'e gan yoblə, beenan' ben' wbanna'.

² San beena' choo cho'a leeja', len' ngoo lall' nee chape' legakb.

³ Na' beena' chap cho'a leej chebka' chsalje'n kwenche cho'e, na' xil'ka' lii chiyombia'tegakb shi'ena'. Na' cho'e le to tob na' chbeje' legakb loo leej chebka'.

⁴ Na' chde chbeje' yog' xil' che'na' na'ch chbialoe' laobka'. Na' xil'ka' xochi chjanogakb le' daa nombia'gakb shi'ena'.

⁵ Aga willjanogakb ben' yoblə, san wxonjdogakib le' daa bi nombia'gakb shi'ena'.

⁶ Bzoa Jesúza' jempli kwenche bzajniile' ben'ka'. Per legake' aga wyajni'gakile' bin zeji daa golle' legake'.

Jesúza' chapshi'e cho'ka ben' chapshi'e xil' che'

⁷ Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'.

⁸ Yog' ben'ka' bid kana' bin' yid', nakgake' ka ben' wban. Na' ben'ka' nia' nakgake' xil' cha' bi bzenaggake' chegake'.

⁹ Nad' nak' ka cho'a leej che xil'ka', na' beena' gonlilallee nad' bi kwiayee, san gake' ka xilaa,

bana' mbalaz choob na' chchejb cho'a leej cheba' na' chllelib dii cheej chaob.

¹⁰ 'Ka nak wbanna', za'ze' kwenche kwane' na' wite' na' wliayee legake'. San nad', zaa kwenche wi'a to yel' mban shao' chegake', na' soagake' mbalaz.

¹¹ Nad' nak' ka to ben' chapshi'e xil' che'na', beena' axt chzani yel' mban che'na' ni che xil'do'ka' nape'.

¹² San beena' chap xil'ka' ni che mba laxje'na', ka chle'ile' ba za' to ba znia gaob xil'ka', lii chchoonlall'tie'gakb na' chxonje' daa bi nakgakb ba che'. Na'ch chllin ba zniana' chox'b xil'ka' na' chsheshlesb legakb.

¹³ Beena' chzi' laxje'na' chxonjtezile' xil'ka', la' daa ikaaz laxje'nan' chibaile', na' bi chakile' legakb.

¹⁴ 'Nad' nak' ka to ben' chapshi' xil'do'. Na' ben'ka' chonlilall'gake' nad' nakgake' ka xil'do' cha'. Nad' nombi'a legake' na' legake' lekzka' nombi'agake' nad'.

¹⁵ Ka chak che Xa'na' nombi'e nad', na' nad' nombi'ane', ka'kzan nad' nombi'a legake', na' chzanid' yel' mban cha'ni ni chegake'.

¹⁶ Na' lekzka' zoach ben' yoblə, ben' zi' gonlilall' nad', na' lekzka' nakgake' ka xil' cha', per bin' gagkake' txen xil' cha'ka'. Na' chiya' gaxgakee kwenche wzenaggake' cha', na' yog'gake' gagkake' tozə, na' toz nad' gak lall' na'gake'.

¹⁷ 'Chaki Xa'na' nad' daa chzanid' yel' mban cha'ni witgake' nad', na'tech yiban' sto shii.

¹⁸ Ni to kono yikaa yel' mban cha'ni, san kwinkza'n wi'an. Nap' yel' wñabia' kwenche wi'a yel' mban cha'ni witgake' nad', na' lekzka' nap' yel'

wñabia' kwenche yiban'. La' kan' nllia Xa'na' bia' gon'.

¹⁹ Na'ch dii yoblə ben' Israelka' lle' na' gokgake' choplə ka bengakile' daa wne'.

²⁰ Zane' che'gake':

—¿Bi'che chzenagzle che beena'? Dii xiwaan yo'e, na' chaktonte'n.

²¹ Na' zi bale' che'gake':

—Aga choe' beeni dill' ka ben' yoo dii xiw', la' aga bi yel' wak nap dii xiwaa yiyonan to ben' lchol'.

Ben'ka' chñabia' ben' Israelka' bi bzenaggake' che Jesúza'

²² Na' do kana', gol' lnina' Jerusalénna' daa chisa'lall'gake' llana' bengake' lall' na' Chioza' yoodo'na', na' nak beo' zag.

²³ Na' chda Jesúza' loo koridor che dii Salomónna' daa ze kwit yoodo'na'.

²⁴ Na' ben'ka' chñabia' ben' Israelka' wye'chjyobgake'ne', che'gake'ne':

—¿Axt batrakzə yikwaso' yel' chakchoplall' chento'ni? Shi li'kzan Crístona', beena' chbeznto' wsel' Chioza', lla wnataga neto' kwenche inezinto'.

²⁵ Na' che' Jesúza' legake':

—Ba wniakz' le' kan', na' bi chajle'le. Yel' wakka' chon', chonlena'n yel' wñabia' che Xa'na', na' chli'n nan len' bselee nad'.

²⁶ Na' le', bi chajle'le daa bi nakle txen ben'ka' nia' nakgake' xil' cha'.

²⁷ Nombi'a ben'ka' nia' nakgake' xil' cha', na' legake' chzenaggake' xtillaana' na' nogake' nad'.

28 Na' cho'a legake' yel' mban zejli kani, na' bi kwiayi'gake'. Na' ni to kono gak yibej legake' lo ni'a na'ni.

29 Xa'na' ba bene' legake' lall' na' gapshiiigakee, na' len' chnabia'che' lao nottez. Na' ni to kono gak yikwas legake' lo ni'a neena'.

30 Ka Xa'na'kz, nad'.

31 Na'ch ben' Israelka' bizgoyogake' yaja' kwenche nan wtakwgake'n Jesúza'.

32 Na' chi'e legake':

—Dii zan dii wen ba ble'ile chonlen' yel' wak che Xa'na'. Na' ¿nonnan' bi choolall'le daa cheenile' wtakwle nad' yaja'?

33 Na' ben'ka' chnabia' ben' Israelka' che'gake'ne':

—Aga ni che dii wenka' ba benon' cheeninto' wtakwnto' li' yaja', san daa chonz kwino' ka Chiozan', la' ben'zə li'.

34 Na'ch che' Jesúza' legake':

—Ley chelena' nan, Chioza' ne': “Nad' wnia' le' nakle chios.”

35 Cho'a Xtill' Chioza' toshiizi nakan ka wne', na' shi cho'en dill' bsi'e “chios” ben'ka' wdixjee xtilleena',

36 ¿biche nazle nad' chnia' che Xacho Chioza' daa nia' nak' Xiine', len' len' wleje' nad' na' bselee nad' yell-lioni?

37 Shi bi chon' ka chon Xa'na', aga wyajle'le cha'.

38 Na' shi chle'ile chon' ka diika' chon Xa'na', li shajle' che diika' chon', la'kzi bi cheenile shajle'le cha', kwenche inezyen'ile Xa'na' zoalene' nad' na' nad' zoalenee.

39 Na'ch dii yoblə goklall'gake' gox'gake'ne' na' bene' gan bile' lawe'ka'.

40 Na'ch bizyaj Jesúza' dii yoblə shłaa yao Jordánna' jazoe' latja' gana' bchoa Juanna' beŋ'ka' nisa' kana'.

41 Na' beŋ' zan wyajgake' gana' zoe' na' che'gake':
—La'kzi bibi yeł' wak bli' Juanna', yog' diika' wne' che beeni nakan dii li.

42 Na' beŋ' zan wyajle'gake' che Jesúza' na'.

11

Wit Lázarona'

1 Yell Betániana' wzoa to beŋ' bi shao' wlie' Lázaro, na' lekzka' na' wzoa beŋ' zane'ka' Mariana' len Mártana'.

2 Mariana', beŋ' zan Lázarona', len' bwazje' set zixa' ni'a Xancho Jesúza' na' bisbillile'n yish' yichje'na'.

3 Na' chop bilte beŋ' zan Lázarona' bsel'gake' rson lao Jesúza' che'gake'ne':

—Xan', bi shao' beŋ' zannto'ni, beeni nllaguilo'.

4 Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiine', sho'a balaan.

5 La'kzi Jesúza' chakchaile' Mártana', na' beŋ' bile'na' na' Lázarona',

6 ka benile' rson bi shao' Lázarona', wllachile' zi chop lla gana' zoe'.

7 Na' ka wde, chi'e beŋ'ka' nakgake'ne' txen:

—Li sho' Judeana' sto shii.

8 Na'ch beŋ'ka' nakgake'ne' txen che'gake'ne':

—Maestro, kani batchgana' goklallii beŋ' Israelka' lle' na' witgake' li' kon yaja'. ¿Ana' cheenilo' yizajo' na'?

9 Na' che' Jesúza' legake':

—¿Aaga shllin goran' de beeni'na' shlla? Na' beena' chda tellalə aga willjachewee daa de beeni'na' yell-lioni.

10 San shi chde' wal-lə, willjachewee daa bi nla'.

11 Na'tech golle' legake':

—Ba ches Lázarona', beena' nllaguicho, na' sha' lljasbanee.

12 Na'ch che' beñ'ka' nakgake'ne' txen:

—Xan', shi ba chese', wiyakshao'lall'kzile'.

13 Jesúza' golle' ka' daa nezile' ba wit Lázarona', na' legake' chakgakile' daa cheszen' golle' ka'.

14 Na'ch be'len Jesúza' legake' dill' ka to sha-jni'gakile', chi'e:

—Ba wit Lázarona'.

15 Na' chibaid' bi wzoa', la' chyaljch gon' ka shajle'chle cha'. Li sho' shajcho gana' die'.

16 Na'ch Tomáza', beena' che'gake' Dídimo*, chi'e beñ'ka' sto:

—Li sho'lene' kwenche lencho guetlenchone' shi witgake'ne'.

Jesúza' chakyisbane' beñ' wetka'

17 Na' ka bllingake' yella', na' che'gake'ne' ba gok tap lla bgash' Lázarona'.

18 Na' Betániana' llian gaozə Jerusalénna', ka do shon kilómetro nlaagakan.

19 Na' beñ' zan beñ' Israelka' lle' Jerusalénna' wyajgake' jenxenlall'gake' Mártana' len Maríana' daa wit beñ' zane'ka'.

20 Na' ka wnezi Mártana' ba zoa illin Jesúza', na'ch jatile'ne', per Maríana' bigaane' lille'ka'.

* 11:16

21 Na' ka blline' kwite'na', chi'ene':

—Xan', shel' zo' ni kana' wlen yillwe' che ben' zan'na' bi wite', shel'ka'.

22 Na' naa la'kzi ba wite', ne'zid' gon Chioza' bittezə dii inabilo'ne'.

23 Na' che' Jesúza'ne':

—Wiban ben' zano'na'.

24 Na'ch che' Mártana':

—Awe, ne'zid' wibane' kat' yiban ben' wetka' llana' te che yell-lioni.

25 Na' che' Jesúza'ne':

—Nad' chon' ka chiban ben' wetka' na' nap' yel' mban dii bi te cheyin. Beena' chonlilallee nad', la'kzi ba wite', wibanchkze'.

26 Na' yog' ben'ka' mban na' chonlilall'gake' nad' bi guetgake' toshiizi. ¿Achajli'o dga nia' li'?

27 Na' che' Mártana'ne':

—Awe, Xan', chajli'a lin' nako' Crístona', na' lin' Xiin Chioza', beena' llia bia' yid yell-lioni.

Wchell Jesúza' gana' bkwash'gake' Lázarona'

28 Na' biyoll wna Mártana' ka', na'ch ziyaje' zjanie' ben' bile' Maríana', na' chi'ene' xochizi:

—Ba bid Maestrona' chnie' li'.

29 Na' kon ka golle' Maríana' ka', lii wzolla'tie' jawie' Jesúza'.

30 Bilan' sho' Jesúza' yella', ni zetie' gana' jatil Mártana'ne'.

31 Na' ben' Israelka', ben'ka' chonxenlall'gake' Maríana' lille'na', ka ble'gakile' wzollee na' zejdoe', na'ch zjanogake'ne' chakgakile' lljchelle' cho'a banan'.

32 Na' ka bllin Maríana' kwit Jesúza', lii bchek'te xibe'na' lawe'na' chi'ene':

—Xan', shel' zoasho' ni, bi wit beṅ' zan'na', shel'ka'.

³³ Na' ka ble'i Jesúza' chbell Maríana', na' ka'kzə beṅ'ka' zejlengake'ne', na' to dii wal inleeb gokile'.

³⁴ Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

³⁵ Na' wchell Jesúza'.

³⁶ Na'ch che' ljwell beṅ' Israelka' lle' na':

—Li wwia ka gokchgaile'ne'.

³⁷ Na'ch baḷe' che'gake':

—Beeni bene' ka ble'i beṅ' lchoḷa', ¿Aaga zak bisle' Lázarona', na' bi wite' shel'ka', lla?

Bisban Jesúza' Lázarona' ladj beṅ' wetka'

³⁸ Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwasha'n cho'ayinna'.

³⁹ Na'ch che' Jesúza':

—Li yikwas yaja' ka'lə.

Na' Mártana', beṅ' zan beṅ' weta', chi'ene':

—Xan', ba chḷa' beena' zban, ḷa' ba gok tap lla wite'.

⁴⁰ Na' che' Jesúza'ne':

—¿Aaga ba wnia' li' shi shajli'o, na' ile'ilo' yel' wak choo yel' wak xen che Chioza'?

⁴¹ Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e:

—Xa, choxkeno' ba bzenago' cha'.

⁴² Nezid' toshiizi chzenago' cha', per chñia' li' kwenche shajle' beṅ'ki lle' ni nan lin' bseloo nad'.

⁴³ Na' ka biyoll wne' ka', na'ch wñie' zillj, chi'e:

—¡Lázaro, bichej na'!

⁴⁴ Na' lii bichejte Lázaroná' ndob ñi'a neena' lech'ka', na' cho'alawe'na' ndoban to lech'. Na'ch che' Jesúza' legake':

—Li yizeshe' lechaa na' li yisane' yiyaje'.

Wloogake' xñezin gox'gake' Jesúza'
(Mt 26:1-5; Mr. 14:1-2; Lc 22:1-2)

⁴⁵ Na' zan beñ' Israelka', beñ'ka' jen Maríana' txen daa wit beñ' zane'na', ble'gakile' ka ben Jesúza' na' benlilall'gake'ne'.

⁴⁶ Per bale' wyaj lao fariseoka' na' jellgake' legake' ka ben Jesúza'.

⁴⁷ Na'ch bꞑozka' chñabia' na' fariseoka' bitopgake' yog' beñ'ka' chñabia' beñ' Israelka', na' che'gake':

—¿Nakraz ka gonchon, lla? La' zan yel' wak chli' beeni.

⁴⁸ Na' shi inacho jwayi beena', yog'z beñ' gonlilall'gake'ne' na'ch yid beñ' Rómaka' na' wlliyi'gake' yoodo' chechoni len yell chechoni.

⁴⁹ Na' len to beñ' le' Caifás, nake' bꞑoz choo bꞑoz xen ka lo yiza'. Na' chi'e legake':

—Bi ñezzilen,

⁵⁰ ni bi chakbe'ile wenlan toz beñ' guet ni che beñ' wlall chechoka', aga ka daa kwiayi' doxen lallchoni.

⁵¹ Na' aga kon ka wnaz Caifáza' kan', san daa nake' bꞑoz choo bꞑoz xen lo yizan', ben Chioza' ka bi'e dill' guet Jesúza' ni che beñ' Israelka'.

⁵² Na' aga ni che toz beñ' Israelkan' guet Jesúza', san lekzka' ni che yog' beñ'ka' ba wleje' gaxgake' xiine' doxen yell-lionin, kwenche gaxgake' toz.

53 Na' daa goll Caifáza' ka', lo llana' wzolo ben-gake' toz dill' kwenche witgake' Jesúza'.

54 Na' daa wzolo chongake' ka', aga wdatekch Jesúza' ladj ben' Israelka', san wzee wyaje' to yell dii le Efraín, daa llia gaozə latja' gana' bibi chashj chleb, na' na'z wzoe' len ben'ka' nakgake'ne' txen.

55 Na' ba zoa gao gal' lni Paskw che ben' Israelka', na' ben' zan ben' yell yoblə wyajgake' Jerusalénna' ka zi' gal' lñina' kwenche yixi yiyechgake' ka nllia leya' bia'.

56 Na' chdagake' chiyilgake' Jesúza', na' shlak lle'gake' lesh' chyoodo'na', chnabi ljwelle':

—¿Beraka chakile? ¿Awide' lñina', lla?

57 Na' bꞑozka' chnabia' len fariseoka' bengake' mandad shi no nezi ga chda Jesúza' do na' lljell-gake' legake' ka' kwenche gox'gake'ne'.

12

Bwazj Maríana' set zixa' ni'a Jesúza'

(Mt 26:6-13; Mr. 14:3-9)

1 Zi' xop lla gal' lni Paskwa' wyaj Jesúza' yell Betániana', gana' zoa Lázarona', beena' bisbane' ladj ben' wetka'.

2 Na' ben'ka' lle' Betániana' bsini'agake' to xshe' che Jesúza', na' Mártana' bdie' yel' wawa'. Na' Lázarona' wche'lene' Jesúza' cho'a mesa' na' nochlə ben'ka' wdaolengake'ne'.

3 Na'ch bex' Maríana' ka do gashj litr set zixa' daa le nardo, daa le zak'chga, na' bwazje'n ni'a Jesúza', na' tech bisbillile'n yish' yichje'na'. Na' doxen loo yoona' wche' shii set zixa'.

⁴ Na' len Jud Scariota', beena' nak Jesúza' txen, beena' gone'ne' lo na' beñ' malka'. Na' golle':

⁵ —¿Berache bi betee set zixa' na' wi'e mecha' gaklenan beñ' yesh'ka', lla? Len la' ka che twiz laxj beñaan zakaan.

⁶ Juda' wne' ka' aga inacho daa chiyeshile' beñ' yesh'kan', san daa nake' to beñ' wbanan. La' len' gok lall' nee xmeche'ka' na' chbane' lat' wejan.

⁷ Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' wkwash'gake' nad'.

⁸ Ka nak beñ' yesh'ka', toshiizin soakz beñ'ka' ladjleni, san nad', aga toshiizin soalen' le'.

Wloogake' xnezin witgake' Lázaroná'

⁹ Na' zan beñ' Israelka' wnezgakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázaroná', beena' bisban Jesúza' ladj beñ' wetka'.

¹⁰ Na'ch bxoza' chñabia' bengake' toz dill' witgake' len Lázaroná'.

¹¹ La' daa biban Lázaroná' ladj beñ' wetka', zan beñ' Israelka' benlilall'gake' Jesúza' na' bich bzenaggake' che bxoza'.

Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

¹² Na' betiyo beñ' be beñ' zil, beñ'ka' lle' yell Jerusalénna' daa chal' lni Paskwa', wnezgakile' ba ngoo Jesúza' nez yilline' yella'.

¹³ Na'ch wyajgake' jlezgake'ne' nox'gake' zinka', na' choe'la'ogake'ne', nagake':

—ǝLi we'la'o Chioza'! ǝGonleeyshga Xancho Chioza' beeni ba bselee inabi'e cho' ben' Israel!

¹⁴ Na' blleli Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

¹⁵ Le' ben' yell Jerusalén, bi illeble.

Li wwia, ni ba za' beena' inabia' le' na' llie' to burr chbando'.

¹⁶ Na' ben'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj ben' wetka', kana'ch gokbe'gakile' nan Cho'a Xtill' Chioza' daa bzej ben'ka' kani'yi choe'n dill' che', na' che diika' bengakile'ne'.

¹⁷ Na' ben'ka' lle'len Jesúza' kana' bisbane' Lázaroná' ladj ben' wetka', ben'ka' bengakile' binie'ne' kwenche bicheje' loo bana', legaken' be'gake' dill' daa bene'.

¹⁸ Daan ben' zan jatilgake' Jesúza' daa bengakile' ka nak yel' waka' bene'.

¹⁹ Na'ch fariseoka' che' ljwellgake':

—Li wwia ka ba chak, bibi de goncho. Li wwia, yog'lolzə ben' ba nogake' le'.

Bal ben' griegoka' chiyiljgake' Jesúza'

²⁰ Ladj ben'ka' wyaj lnina' Jerusalénna' je'la'ogake' Chioza' na' len bal ben' griego.

²¹ Na' ben'ki jabig'gake' gana' ze Felípena', beena' nak ben' yell Betsaida daa llia yell-lío daa mbani Galileana', na' che'gake'ne':

—Ben'do', cheeninto' we'lennto' Jesúza' dill'.

²² Na' Felípena' jelle' Andréza' ka', na' choptie' wyajgake' jellgake' Jesúza' ka'.

²³ Na'ch che' Jesúza' legake':

—Ba bllin lla, nad', Ben' Bsel' Chioza' Yell-lioni, sho'a balaan xenna'.

²⁴ Dii li nia' le', shi to biñ che trígona' bi igasha'n loo yona', ka'chokzə kwe'n. Per shi igasha'n loo yona', na' yila'n na' yiyakan dii zan wal.

²⁵ Beena' ze wneyi che yel' mban che'na' yell-lioni, len' kwiayee. San beena' chzani yel' mban che'na' bittezə dii gak che', beenan' gat' yel' mban che' zejli kan.

²⁶ Nottezə ben' cheenile' gone' xshin'na' chiyał' gone' nad' txen. Na' gana' soa', na'kzə soe'. Na' beena' gon xshin'na', Xa'na' kwee le' balaan.

Wdixjee Jesúza' witgake'ne'

²⁷ 'Naatek chakyeshid' dii wal inleeb. ¿Awnabid' Xa'na' yisle' nad' lawi dga wtil', lla? Bi gak gon' ka', la' ni cheyi dgayen'kzan bid'.

²⁸ Na'ch golle':

—Xa, benschki ka shoo balaan.

Na'ch wne Chioza' yabana', chi'e:

—Ba ben' kwenche wyo'a balaan, na' naa gon' ka sho'a balaan sto shii.

²⁹ Na' ben'ka' lle' na' bengakile' shii Chioza', na' bale' wnagake' wziwa'zan wne. Na' zi bale' wna to anjlan' ba wnie' le'.

³⁰ Na'ch Jesúza' chi'e legake':

—Aga ni cha' nadaan wne Chioza', san ni che len'.

³¹ Na' ba bllin lla gone' yel' joschis che yog' ben' lle' yell-lioni, na' naa kweje' dii xiwaa daa chnabia' yell-lioni.

³² Na' kat'ka' wlisgake' yaga' cha'lə gana' nda'gake' nad', kanan' gat' latj gonlilall' nottezə ben' nad'.

³³ Na' daa wne' ka', bzajniile' legake' nakan guete'.

³⁴ Na' ben'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Crístona', beena' wsel' Chioza' inabi'e, soe' zejli kani. Na' ¿biche nazo' Beena' Bsel' Chioza' Yell-lioni wligake'ne' cha'lə wwia ben' le' lee yaga' gana' dee? ¿Nora Beena' Bsel' Chioza' Yell-lioni no' ka'?

³⁵ Na'ch che' Jesúza' legake':

—Nad' nak' beeni' che ben' yell-lioni, per zi shlollchga soalen' le'. Li sho' lo nez lina' shlak ni de beeni'na' kwenche bi gak chele ka chak che to ben' chalile' kat' ngwee' nez. La' beena' chda' gana' shchol bi nezile' galan zeje'.

³⁶ Li gonlilall' nad' naa shlak ni zoalen' le' kwenche sho' beeni' cha'na' loo yichjlall'do'lena'.

Biyoll wna Jesúza' ka' na'ch bizee jakwashi'le' legake'.

Ben' zan ben' Israelka' bi wyajle'gake' che Jesúza'

³⁷ La'kzi ben' Israelka' ble'gakile' yel' wak zan daa ben Jesúza', zangake' bi benlilall'gake'ne'.

³⁸ Na' daa bengake' ka', gok ka wna dii Isaíaza', beena' wdixjee daa goll Chioza'ne' kani'yi, daa wne':

Xan' ¿azoa ben' ba wyajli'e dillaa chyixje'nto'?

Na' ¿azoa ben' ba gokbe'ile' bli'o yel' wak cho'na'?

³⁹ Na' bi wyajle'gake', la' Chioza' bene' chegake' ka na sto dii bzej dii Isaíaza':

⁴⁰ Bene' legake' ka ben' lchol na' lall'do' chech kwenche bi gakbe'gakile' bi zejin diika' chle'gakile',

ni bi shajni'gakile' diika' chengakile',

kwenche ki yiyaj yilengakile' na' yiyone' legake' ben' wen.

41 Wna Isaiáza' ka' daa ble'ile' ka' nak balaan xen wala' nap Jesúza', na' bi'e dill' che'.

42 Na' la'kzi ka', ben' zan ben' Israelka' lente no ben' wnabia' che'ka' benlilall'gake' Jesúza'. Per bi be'gake'n dill' daa bllebgake' bich wleb fariseoka' legake' gana' chdop chllaggake' choe'llwillgake' Chioza',

43 la' wyoolall'chgake' ina ben' nakgake' ben' wen aga ka daa ina Chioza' nakgake' ben' wen.

Cho'a xtil' Jesúza' nakan dii llialo

44 Na'ch wne Jesúza' zillj chi'e:

—Nottez ben' chonlilall' nad', aga toz' nadaan chonlilallee, san len beena' bsel' nadaan chonlilallee.

45 Na' nottezə ben' chle'ile' nad', lezkza' chle'ile' beena' bsel' nad'.

46 Zaa yell-lioni kwenche beena' gonlilallee nad' te' lo beeni' cha'na' na' bich soe' lo yel chola'.

47 Na' shi no ben' chenile' cho'a xtillaani na' bi chone' ka nia', aga nadaan wchogloa' che', la' aga zaa kwenche wchogloa' che' ben' yell-lionin, san zaa kwenche yislagakee na' bi kwiayi'gake'.

48 Beena' bi cheenile' gonlilallee nad' na' bi chzenague' cha', de daa gawan xya che'. Cho'a xtillaana' daa ba bi'a, lennan' gawan xya che' kat' illin lla te che yell-lioni.

49 La' dillaa daa ba bi'a aga to bia'lozan' wnia' ka'. Xa'na', beena' bsel' nad', len' nllie' bia' bin chiyal' inia' na' bin chiyal' wli' wsedid' ben'.

⁵⁰ Na' nezid' dill' daa nllia Xa'na' bia' inia' nsa'n yel' mban zejli kani. Daan, yog'lol' diika' nia', nakan kon ka wna Xa'na' nad'.

13

Wdib Jesúza' ni'a ben'ka' nakgake'ne' txen

¹ Ka ba zoa gal' lni Paskwa', na' nezi Jesúza' ba zoa gao yizee yell-lioni kwenche yiyaje' kwit Xe'na'. Na' chakchgaile' ben'ka' nonlilall'gake'ne' yell-lioni, na' ka' gokile' legake' axt ga zeelo.

² Na' ka chaogake' xshe'na', ba wloolə dii xiwaa loo yichjlall'do' Jud Scariota', xiin Simónna', gone' Jesúza' lo na' ben' malka'.

³ Na' nezi Jesúza' Xe'na' bene' lall' nee yog' dii de, na' nezile' wzee gana' zoa Chioza' na' kwite'na'kzə yilline' dii yoblə.

⁴ Na' lo zej chaogake' xshe'na', wzolla' Jesúza' na' bkwase' xe' dii toña' ka'lə, na' bchele' to lech' lsineena'.

⁵ Na'ch wdee nisa' to loo sha' na' wzoloe' chyibe' ni'a to to ben'ka' nakgake'ne' txen, na' bisbillile'n lechaa ncheje' lsineena'.

⁶ Na' ka bidol' chibe' ni'a Simón Pédrona', na'ch che' Pédrona'ne':

—Xan', ¿ali'lə chibzo' ni'ani?

⁷ Na' che' Jesúza'ne':

—Aga chajniilo' dga chon' naa, per techlə shajni-ilo'n.

⁸ Na'ch che' Pédrona'ne':

—Bat wi'a latj chibo' ni'ani.

Na'ch che' Jesúza'ne':

—Shi bi chib' ni'ona', bich gako' nad' txen.

⁹ Na'ch chize' Pédrona'ne':

—Shi kan' nakan, X̄an', aga toz ñi'ani çhibo' san len yichji na' na'ki.

10 Na'ch che' Jesúza'ne':

—Beena' nosh' nazje', toz ñi'enan' chiyal' shech, la' ba nechkz kwerp che'na'. Ka'kzan le', ba nxi nyechle, la'kzi aga yog'le.

11 Daa ñezi Jesúza' non gon le' lo na' beñ' malka', daan chi'e legake': “Aga yog'le ba nxi nyech.”

12 Na' ka biyoll wdibe' ñi'eka', na'ch biyakwe' xe' dii ton'a' na' jachi'e cho'a mesa' sto shii. Na' chi'e legake':

—¿Añezile bi zejín dga ba ben'?

13 Le' nale nad' Maestro na' X̄an', na' lekzile, la' kan' nakan.

14 Na' shi nad', naktia' Maestro chele na' X̄anle, ba wdib' ñi'alena', lekzka' le' chiyal' çhib ñi'a ljwell-le.

15 Ba ben' dga kwenche bliid' le' kan' chiyal' gon che ljwell-le.

16 Dii li nia' le', aga zak'chi to mos ka x̄ane'na', na' to beñ' zej mandad aga zak'che' ka beena' bseleene'.

17 Shi chajniile diiki ba wnia' na' gonlen, na' soale mbalaz.

18 Na' aga yog'len nia' ka'. Nezi' nolen ba wlej' kwenche nonlilall'le nad'. Na' chiyal' gak ka na Cho'a Xtill' Chioza', gana' na: “Beena' chaolentie' nad' txen ba chiyechje' nad' gone' mal cha'.”

19 Naa nia' le' dga zi' gak, kwenche kat' ba chakan shajle'le nak' beena' ba wnia' nak'.

20 Na' dii li nia' le', beena' wlebe' nottezə beena' wselaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

Wdixjee Jesúza' ka gon Juda' wdie'ne' lo na' ben' malka'

(Mt 26:20-25; Mr. 14:17-21; Lc 22:21-23)

²¹ Na' biyoll wna Jesúza' ka', le gokyeshii loo yichjlall'do'ena', na' bi'e dill' kwaslól, chi'e:

—Dii li nia' le', tole gonle nad' lo na' ben' malka'.

²² Na'ch ben'ka' nakgake'ne' txen chwia ljwell-gake' chakgakile' nogaken' chi'e ka'.

²³ Na' to beena' nak Jesúza' txen, beena' chakch-gaile', chi'e kwite'na'.

²⁴ Na' Simón Pédróna' bene' seṅ kwenche inabi beena' chi' kwit Jesúza' noen' chi'e ka'.

²⁵ Na'ch jabig'ch beena' gaoch kwit Jesúza' na' wṅabile'ne', chi'ene':

—¿Noran gon ka', Xan'?

²⁶ Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiin beena' le Simón.

²⁷ Na' kon ka biyoll be' Jesúza' Juda' yetxtila', lii wyoote Satanáza' loo yichjlall'do'ena'. Na'ch che' Jesúza'ne':

—Daa ba ngoo yichjo' gono', bentegan.

²⁸ Na' ni to ben'ka' chaolengake'ne' bi wya-jni'gakile' bi'che gollze'ne' ka'.

²⁹ Bale' gokgakile' goll Jesúza' Juda' lljxi'e bi dii chyalljgakile' che xshe' che'ka', wa wi'e lat' mech ben' yesh'ka'. La' len' nak lall' nee xmeche'ka'.

³⁰ Na' ka wde wdao Juda' yetxtila' daa be' Jesúza'ne', lii wza'tie'. Na' ba gol ka wzee.

Dii koba' daa nllia Chioza' bia'

³¹ Na' ka wde wza' Juda', na'ch che' Jesúza':

—Ba bllin lla sho'a balaan, nad', Ben' Bsel' Chioza' Yell-lioni, na' lekzka' dga gon', gonan ka sho' Chioza' balaan.

³² Na' daa gon' ka sho' Chioza' balaan, lekzka' kwın Chioza' gone' kwenche nad', Ben' Bsel' Chioza' Yell-lioni, sho'a balaan, na' lii gontie'n.

³³ Le' xiındawaa, zi shlollchga zoalen' le'. Na' yiy-iljle nad', na' chiznia' le' ka gosh' ben'ka' chnabia' ben' Israelka': Gana' yiyaa, bi gak sa'le.

³⁴ Na' to dii kob chllia' bia' gonle naa: Li gaki ljwell-le. Ka chakid' le', kan' chiyał' gaki ljwell-le.

³⁵ Shi gaki ljwell-le, na'ch inezi yog'lolte ben' nakle nad' txen.

*Wdixjee Jesúza' bi wcheb Pédróna' shi nombi'ene'
(Mt. 26:31-35; Mr. 14:27-31; Lc. 22:31-34)*

³⁶ Na'ch Simón Pédróna' wnabile' Jesúza', chi'ene':

—Xan', ¿garan yiyajo'?

Na' che' Jesúza'ne':

—Aga wak soo gana' yiyaa naa, per wllin lla soo.

³⁷ Na'ch che' Pédróna'ne':

—Xan', ¿berache bi gak sa'len' li' naa? Ba nchoglallaa guet' ni cho'.

³⁸ Na' Jesúza' chi'ene':

—¿Achakilo' ba nchoglalloo gueto' ni cha'? Dii li nia' li', shon shii bi wchebo' shi nombi'o nad' ka zi kwell-lə shikwteza'.

14

Jesúza' nake' neza' chillin kwit Xe' Chioza'

¹ Bi gakshejlall'le. Li gonlilall' Chioza' na' lekzka' li gonlilall' nad'.

² Lill xlatj Xa'na' dii xen latj de. Shel' bi nakan ka', ba wnia' le' ka', shel'ka'. Na' naa yiyaa lljayen-shawaa gana' yidzoale.

³ Na' kat' ba beshawaan, na'ch yiyed' yidxia' le' kwenche lenle soale gana' zoa'.

⁴ Na' ba nombia'le neza' daa chillin gana' lljazoa'.

⁵ Na'ch Tomáza' chi'ene':

—Xan', bi nezinto' gan yiyajo'. ¿Nakran gonnto' yillelinto' neza'?

⁶ Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a ben' yel' mban zejli kani. Aga no yillin kwit Xa'na' shi bi gonlilallee nad'.

⁷ Daa ba nombia'le nad', lenkz Xa'nan' ba nombia'le. Na' naa ba nombia'lene' na' ba ble'ilene'.

⁸ Na'ch che' Felípena'ne':

—Xan', ben ka ile'into' Xo'na' na' xenlall'nto'.

⁹ Na'ch billii Jesúza' xtilleena', chi'e:

—Felipe, ba wlla zoalen' le', ¿ana' bikzan' gombia'yenoo nad'? Beena' ba ble'ile' nad' lekzka' ba ble'ile' Xa'na'. ¿Berache chnabzo' gon' ka ile'ilene'?

¹⁰ ¿Abi chajli'o zoalen Xa'na' nad' na' nad' zoale-nee? Diika' nia' le' aga to bia'lozan' chnia'n, san daa cheeni kwin Xa'na', beena' zoalene' nad', lennan' cho'a dill' na' lennan' chon'.

¹¹ Li shajle' daa nia' zoalen Xa'na' nad', na' nad' zoalen' le'. Na' shi bi chajle'le dga nia', la'ch' li shajle' cha' ni che yel' wakki chle'ile' chon'.

¹² Dii li nia' le', nottez ben' chonlilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit Xa'na'.

¹³ Na' gon' bittez daa inabile Xa'na' daa nakle nad' txen kwenche sho'e balaan ni cha'.

14 Nad' gon' bittezə daa inable daa nakle nad' txen.

Bcheb Jesúza' wselee Espíritu Sántona'

15 'Shi chakile nad', li gon diika' nllia' bia' gonle.

16 Na' inabid' Xa'na' wselee sto beñ' gaklene' le' na' soalene' le' toshiizi.

17 Len' Espíritu Sántona', beena' chli' daa nak dii li. Na' beñ' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjlall'do'lena'.

18 Aga wikwaan' le' ka bi' wizeb, san wiyedch' soalen' le'.

19 Aga chllach bich ile'i beñ' yell-lioni nad', san le' wle'chkzile nad'. Na' daa mban' toshiizi, lekzka' le' toshiizi ibanle.

20 Kat' illin llana' nia' ka', na' gakbe'ile zoalen' Xa'na', na' le' zoalenle nad' na' nad' zoalen' le'.

21 Nottez beñ' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki Xa'na'ne', na' nad' lekzka' gakidee na' gon' kwenche gombia'che' nad'.

22 Na' Júdaza' (beena' sto, aga Jud Scariota,) chi'ene':

—Xan', ¿berache to neto'z gonzo' ka gombia'chnto' li' na' bi len beñ' yell-lioki, beñ'ka' bi chonlilall'gake' li'?

23 Na' billii Jesúza' xtilleena':

—Beena' chakile' nad', wzoe' xtillaa, na' Xa'na' gakile'ne', na' nad' kon Xa'na' yidsoalennto'ne'.

24 Na' beena' bi chakile' nad', bi chzoe' xtillaa. Na' diika' chli' chsedid' aga dii chyiljlallzaan, san Xa'na', beena' bsel' nad', chzajniile'n nad'.

25 'Yog' diiki choe'len' le' dill' n_{aa} shlak ni zoalen' le'.

26 Na' kat' bich soa' len le', Espíritu Sántona', beena' wsel' Xa'na', gaklene' le' na' wzajniile' le' yog' dii chiyal' inezile, na' gone' ka lljadinile yog' diika' ba wnia' le'.

27 'Yel' mbalaza' chkwaanlena'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble.

28 Ba benzkzile nia' yiyaa gana' zoa Xa'na' na' lekzka' wiyedchkz' yidzoalen' le'. Na' shi chakile nad', chiyal' yibaile daa yiyaa gana' zoa Xa'na', la' zak'che' aga ka nad'.

29 Na' ba nia' le' diiki zi' gak kwenche kat' gakan shajle'le.

30 'Na' bich bitek dill' we'lench' le' naa, la' ba za' dii xiwaa, daa chn_{abia}' yell-lioni. Per aga wak in_{abia}'n nad'.

31 La' chon' kon ka nllia Xa'na' bia' gon' kwenche in_{ezi} ben' yell-lioki chakid' Xa'na'. Li yizolla'. Li yidó.

15

Jesúza' chzaklebi kwine' to yag uva

1 'Nad' nak' ka yag uva daa nak dowalj, na' Xa'na' nake' ka beena' chaz chaan_{an}.

2 Na' yog'lol' xoz' xka'inna' daa bi chbia, chchogue'n. Na' diika' chbia, chonshao'che'n kwenche zizikli kwian.

3 Na' le', nakle ka xoz' xka'inna' daa chbia, daa bzenagle ka nak dill'ka' be'len' le'.

⁴ Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndil nllagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

⁵ 'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gakle ka xoz' xka'inna' daa chbiachga. Shi le' bi nakle nad' txen aga bi gak gonle.

⁶ Beena' bi gone' ka dii le gone' nad' txen, nake' ka xoz' xka'inna' daa ba b̄chogue' na' ibillan, na' yitope'n wzaleen lo yi'na' kwenche sheyan.

⁷ Shi le' soatezi soale gonle nad' txen na' toshiizi chzoale xtillaana', li in̄ab daa cheenile na' gakan.

⁸ X̄a'na' cho'e balaan̄ kat' chonle dii wenna', na' daa chonle ka', chli'lawin dii li nakle nad' txen.

⁹ Ka chaki X̄a'na' nad', ka'kzan chakid' le'. Li soatezi soa gonle nad' txen kwenche gakbe'ile chakid' le'.

¹⁰ Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia' X̄a'na' bia' gon', na' ka' chakbe'id' le chakile' nad'.

¹¹ 'Ba wnia' le' ka' kwenche yiba yizaklenile' nad', na' yiyoll yido soale mbalaz.

¹² Na' dgan nllia' bia' gonle: Gaki ljwell-le ka chakid' le'.

¹³ Bich bi yel' chaki dii xench de ka che beena' chzani yel' mban che'na' guete' ni che ben'ka' nlaguile'.

¹⁴ Len' nakle ben'ka' nllaguid' shi chonle ka nllia' bia' gonle.

15 Bich gon' le' ka mos, la' beena' nak mos aga nezile' bin chon xane'na'. San nakle ben' nllaguid' la' ba bzajniid' le' yog' diika' wna Xa'na' nad'.

16 Aga len' wlejle nad', san nadaan wlej' le' na' ba bzoa' le' shajle lljenle dii wenna' daa bi te cheyi. Na' Xa'na' gone' yog' daa inabilene' daa nakle nad' txen.

17 Na' dgan chllia' bia' gonle: Gaki ljwell-le ganga.

Ben'ka' bi nombia' Chioza' gakzbangakile' ben'ka' nak Crístona' txen

18 'Bibi gakile shi ben'ka' bi nombia' Chioza' gakzbangakile' le', la' nezczile ka'kzan gokzbangakile' nad'.

19 Shel' nakle legake' txen na'ch gaggakile' le', shel'ka'. Per daa ba wlej' le' kwenche gagle nad' txen, daan chakzbangakile' le'.

20 Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtillaana', lezkka' wzenaggake' chele.

21 Yog' diikin gongakile' le' daa nakle nad' txen, la' bi nombia'gake' Xa'na' beena' bsel' nad'.

22 'Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'.

23 Beena' chakzbanile' nad' lenkz Xa'nan' chakzbanile'.

24 Aga bi dol' napgake' shel'ka' bi bli'a yel' wakka' daa konon' gon ladje'ka'. Na' la'kzi ba ble'gakile' diika' chon', bia'kzə chakzbangakile' nad' na' Xa'na'.

25 Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

26 'Na' wselaa Espíritu che Xa' Chioza', beena' gaklene' le'. Espírituna', beena' chli' daa nak dii li, see gana' zoa Xa' Chioza' na' yidyee xtilaa.

27 Na' lekzka' lenle we'le cho'a xtilaana', la' ba gokle nad' txen ka wzoloa' chli' chsedid' ben'.

16

1 'Ba wnia' le' diiki kwenche bi yidinjile' daa chonlilall'le nad'.

2 La' bich wlebgake' le' gana' chdop chllagcho choe'lwillcho Chioza', na' wllin lla axt wit ben' le' daa gakile' kan' chazlall' Chioza'.

3 Gongake' ka' daa bi nombia'gake' Xa'na', ni bi nombia'gake' nad'.

4 Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

Daa chon Espíritu Sántona'

5 'Na' naa yiyaa lljazoalen' Xa'na' beena' bsel' nad', na' ni stole bich chnabile nad' gan yiyaa.

6 Na' daa ba wnia' le' ka' le chakyesh'zi'le'.

7 Per dii li nia' le', wakch wen chele shi yiyaa. La' shi bi yiyaa, beena' gaklene' le' bi yidsoalene' le'. San shi ba ziyaa, na' wselaaane'.

8 Na' kat' yide', gone' kwenche gakbe'i ben' yell-lioki nakgake' ben' saaxya daa bi biyombia'gake' beena' nak dowalj ben' li ben' shao', na' gakbe'gakile' chidol'gake' wchoglo Chioza' chegake' ni che xtoleeka'.

9 Yiyakbe'gakile' napgake' dol' daa bi chonlilall'gake' nad'.

10 Na' yiyakbe'gakile' nak' ben' li ben' shao' daa yiyaa gana' zoa Xa'na' na' aga wle'chile nad'.

11 Na' lekzka' yiyakbe'gakile' Chioza' wi'e yel' zak'zi' che ben'ka' bi chzenag cha', la' ba bhogloe' sak'zi' dii xiwaa daa chnabia' yell-lioni.

12 'Dii zanch de dii inia' le', dii bi shajniile naa.

13 Per kat' ila' Espíritu Sántona', beena' chli' daa nak dii li, len' wzajniile' le' kwaslol daa nak dii li. La' aga dii chiljlall'ze'n ine', san ine' daa che' Xa'na'ne', na' chixje'ile' le' diika' zi' za' gak.

14 Na' gone' ka sho'a balaan, la' wzajniile' le' diika' ba wnia'.

15 La' yog'lolte daa na Xa'na' lennan' cho'a dill'. Daan nia', Espírituna' wzajniile' le' diika' ba wnia'.

Yel' chakyeshiina' yiyakan yel' xaba

16 'Aga chllach bich ile'ile nad', na' lekzka' aga wlla yizle'ile nad'.

17 Na' bal ben'ka' nakgake'ne' txen wnabi ljwelle':
—¿Bera zejin daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'?

18 ¿Bi zejin daa naze' “aga chllach”? Bi chajni-icho biche naze' ka'.

19 Na' Jesúsza' gokbe'ile' cheengakile' inabgakile'ne' bi zejin daa wne', na'ch chi'e legake':

—¿Achnabi ljwell-le bi zejin daa wnia' le' aga chllach bich ile'ile nad', na' lekzka' aga wlla yizle'ile nad'?

20 Dii li nia' le', kwell-le na' gakyeshile shlak ben'ka' bi nombia' Chioza' yibagakile'. Na' la'kzi

gakyeshile, yel' chakyeshii chelena' yiyakan yel' xaba.

²¹ Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le chibaile' ba zoa to bi'do' che' yell-lioni.

²² Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

²³ 'Na' kana'chan bich bi inabile nad'. Dii li nia' le', bittezə dii inabile Xa'na', gonkze'n, daa nonlilall'le nad'.

²⁴ Axt naa ni to bibin' inabile Xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

Jesucrístona' ba bene' gan daa chnabia' yell-lioni

²⁵ 'Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che Xa'na' ka to shajniilen.

²⁶ Na' kat' ba bllin llana', kanan' inabile Xa'na' bittezə dii inabilene' daa nonlilall'le nad', na' bi chonan byen kwin' inabidee gaklene' le',

²⁷ la' kwinkz Xa'na' chakile' le' daa chakile nad' na' daa chajle'le bselee nad'.

²⁸ Wzaa gana' zoa Xa'na' kwenche bid' yell-lioni, na' naa yizaa yell-lioni kwenche yiyaa gana' zoe'.

²⁹ Na'ch che' ben'ka' nakgake'ne' txen:

—Naach ba choo dill' dii najnii, na' bich bi jempl chchino'.

³⁰ Na' chakbe'into' nez nle'ilo' yog'lolte, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li zoo gana' zoa Chioza'.

31 Na' che' Jesúza' legake':

—¿Añaach chajle'le?

32 Ba zoa illin lla, wa ba bllinkz llana', illeshlesle na' gala ikaa twej tweje, na' yikwaanle toz'. Per aga tozan' yigaana', la' zoalenkz Xa'na' nad'.

33 Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li gondiplall', la' ba ben' gan daa chñabia' yell-lioni.

17

Be'lwill Jesúza' Chioza' che ben'ka' nakgake'ne' txen

1 Na' ka wde wna Jesúza' diika', na' blis jalawe'na' bwie' yabalə, na' golle':

—Xa, ba bllin gor illagloa' daa llia bia' wtil'. Wloonad' balaan, nad' nak' xiño', kwenche lekzka' nad' kwaa li' balaan.

2 La' ba beno' lo na' inabia' lao yog'lol ben', kwenche gon' ka gat' yel' mban zejli kani che ben'ka' wlejo' gonlilall'gake' nad'.

3 Na' daa gat' yel' mban zejli kani che ben', zejin nombia'gake' li', nako' dowalj Chios, na' lekzka' nombia'gake' nad', ben' bseloo yell-lioni.

4 Nad' ba wlo'a li' balaan lao ben' yell-lioki, na' ba biyoll ben' daa bllio' bia' gon'.

5 Na' naa, Xa, yiyongacho' nad' balaanna' kat' yiyed' kwito'na' ka balaanna' daa wdapkz' kana' wzoalen' li' ka zi' xe sil yell-lioni.

6 Ba beno' nad' ben'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'.

7 Na' naa ba nezgakile' yog' dill'ka' bi'a nakan dii wno'.

8 La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li wzaa gana' zo' na' ba wyajle'gake' lin' bseloo nad'.

9 'Chnabid' li' gakleno' legake'. Aga chnab' gakleno' yog' ben' yell-lioki, san chnab' gakleno' ben'ka' wlejo' kwenche gonlilall'gake' nad', la' lall' non' nakgake'.

10 Na' yog' ben'ka' nak lall' na' lekzka' nakgake' lall' no'. Na' legake' ba wloogake' nad' balaan.

11 'Na' naa ba chiza' yell-lioni. Na' legake' yi-gaangake' ni. χa, li' nako' dowalj ben' wen ben' shao'. Wdapgach ben'ka' ba ben'o' nonlilall'gake' nad' kon yel' wak ch'o'na' kwenche gagkake' toz, ka nakcho cho' nakcho toz.

12 Shlak wzoalen' legake' yell-lioni ba wdap bwia' legake' kon yel' wak ch'o'na'. Na' ni toe' bi wlliaiyi', letechokzə beena' ba nakan kwiayee, kwenche gak ka na Cho'a Xtilloona'.

13 'Na' naa ba zizaa gana' zo'. Na' nia' li' diiki shlak ni zoa' yell-lioni kwenche ben'ki gapgake' yel' xaba ka daa nap'.

14 Nad' ba bzajniid' legake' cho'a xtilloona', na' ben'ka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen ben'ka' bi nombia' li'.

15 Aga chnabid' li' yikoo ben'ki nonlilall' li' lo yell-lioni, san chnab' wkweejgachgako'ne' kwenche ki chitj seni dii mala' daa chda yell-lioni legake'.

16 Bi nongake' txen ben'ka' bi nombia' li', ka chon' nad' bi chon' ben'ka' txen.

17 Bengach kwenche beŋ'ki nonlilall' nad' gachgake' ka chazlalloo daa chzenaggake' dill' li cho'na', la' cho'a xtilloona' nakan dii li.

18 Ka beno' bseloo nad' kwenche bidsoa' yellioni, ka'kzan chselaa legake' kwenche shajgake' ladj beŋ' yell-lioki.

19 Chzanlallaa kwini' gon' ka no' ni chegake', kwenche lekzka' gongake' ka no' daa ba chzenaggake' dill' li cho'na'.

20 'Aga chnabid' li' gakleno' to lezgake', san lekzka' chnab' gakleno' beŋ'ka' gonlilall' nad' kat' wzenaggake' cho'a xtilloona' daa we' beŋ'ki.

21 Xa, chnabid' li' gonshgo' ka gak yog'gake' toz, ka nakcho cho' nakcho toz. Lekzka' chnab' gachgake' cho' toz kwenche beŋ'ka' bi nonlilall' li' shajle'gake' lin' bseloo nad'.

22 Ba wlo'a legake' balaan ka daa wloo nad', kwenche gachgake' toz ka nakcho cho' nakcho toz.

23 Nad' nagakee toz ka nakcho cho' nakcho toz. Bengach ka gachgake' toz ka chiyal', kwenche beŋ'ka' bi nonlilall' li' gakbe'gakile' lin' bseloo nad', na' gakbe'gakile' chakilo' beŋ'ka' nonlilall' nad' ka chakilo' nad'.

24 'Xa, li' ba beno' nad' legake', na' cheenid' soalengake' nad' gana' soa' kwenche ile'gakile' balaan cha'na' daa beno' nad' ka zi' xe silte yellioni daa chakilo' nad'.

25 Xa, li' nako' beŋ' li' beŋ' shao'. La'kzi beŋ'ka' bi nonlilall' nad' bi nombi'gake' li', nad' nombi'a li' na' beŋ'ki nonlilall' nad' nezgakile' lin' bseloo nad'.

26 Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gachgakile' beŋ', na' nad' soalenkzakee.

18

*Bex'gake' Jesúza'**(Mt. 26:47-56; Mr. 14:43-50; Lc. 22:47-53)*

¹ Na' ka biyoll wna Jesúza' ka', wza'lene' ben'ka' nakgake'ne' txen wyajgake' shlaa yao Cedrónna', na' wyoolene' legake' to yell-lio ga lle' lla' yag olivo.

² Na' Juda', beena' bene' Jesúza' lo na' ben' malka', lekzka' nombi'e latja', la' Jesúza' zan shii wyajlene' legake' na'.

³ Na' bllinlen Juda' ben' zan soldad na' zi xonj ben'ka' chap yoodo'na', ben'ka' bsel' bxozka' chnabia' len fariseoka'. Zejgake' nox'gake' no kandil, no yi' yech, na' dii wniagakile'.

⁴ Na' Jesúza' ba nezkzile' yog' daa zi' gak che', na'ch bcheje' jatile' legake', na' chi'e:

—¿Non chiyilje?

⁵ Na' che'gake'ne':

—Jesús, ben' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' Juda', beena' bene' le' lall' na'gake'.

⁶ Na' ka goll Jesúza': “Nadaan”, to biza'zgake' jayetgake' wza'che'lə.

⁷ Na'ch wiznabi Jesúza' legake':

—¿Noran chiyilje?

Na' che'gake'ne':

—Jesús, ben' Nazaretan'.

⁸ Na'ch che' Jesúza' legake' sto shii:

—Ba wniakz' le' nadaan. Na' shi nadaan chiy-ilje, li we' latj yiyaj ben'ki.

9 Golle' legake' ka' kwenche billinin daa wne': "Xa, ba wdap' beŋ'ka' beŋo' nad' na' ni toe' bi wlliyi'."

10 Na' Simón Pédróna' no'e to spad, na'ch wleje'n bchogue' tlaa nag to beŋ' le Malco, de shlina'. Na' Málcona' nake' xmos b̄xoz choo b̄xoz xenna'.

11 Na'ch che' Jesúza' Pédróna':

—Bigoo spad cho'na' loo lillinna'. La' chonan byen gak cha' daa ba nllia Xa'na' bia' gak.

Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

12 Na'ch soldadka' len xane'ka', na' beŋ'ka' chap yoodo' che beŋ' Israelka', beŋ'gake' Jesúza' na' bchejgake'ne'.

13 Na' zigaate jwa'gake'ne' lao Anáza' xtobiin che Caifáza', na' Caifáza' nake' b̄xoz choo b̄xoz xen lo yiza'.

14 Na' Caifáza', len' beena' golle' beŋ'ka' chnabia' beŋ' Israelka' wenchlan witgake' toz Jesúza' aga ka daa kwiayi' yog' beŋ' wlall che'ka'.

Bi bcheb Pédróna' shi nombi'e Jesúza'

(Mt 26:69-70; Mr. 14:66-68; Lc 22:55-57)

15 Na' Simón Pédróna' len sto beŋ' nake' Jesúza' txen janogake'ne'. Na' beena' zejlen Pédróna' txen nombia' b̄xoz choo b̄xoz xenna'ne', daan gok wyoolene' Jesúza' lesh' chyoo che b̄xoz choo b̄xoz xenna'.

16 Na' Pédróna' wzie' cho'a leeja'. Na'ch beena' nombia' b̄xoz choo b̄xoz xenna', bicheje' jashalj-lene' bi' nool wewaa chap cho'a leeja' kwenche be'b' latj wyoo Pédróna'.

17 Na'ch bi' nool wewaa chap cho'a leeja' che'b' Pédrona':

—¿Aaga lenon' nako' beeni txen?

Na' che' Pédrona'b':

—Bi len' nakee txen.

18 Na' moska' len beṅ'ka' chap yoodo'na' wlek-gake' yi'na' kwenche wbillgake' daa ba chak zag. Na' jselen Pédrona' legake' cho'a yi'na' kwenche billa'ile'.

Wnabyolli Anáza' Jesúza'

(Mt 26:59-66; Mr. 14:55-64; Lc 22:66-71)

19 Na' beena' nak b̄xoz choo b̄xoz xen wnabyollile' Jesúza' no beṅ'ka' nakgake'ne' txen na' beran chli' chsedile'.

20 Na' che' Jesúza'ne':

—Ladj lkwe' beṅaan ba bi'a dill'. Ba bli' bsedid' beṅ'lesh' chyoodo'na' na' gachlæ chdop chllag beṅ'wlallka' choe'lwillgake' Chioza'. Na' bibi dill' bi'a do ngash'zə.

21 ¿Berache chṅabzilo' nad'? Wṅabi beṅ'ka' ba bli' bsedid' kwenche inagake' li' beran ba goshgakee. La' nezgakile' bin ba bli' bsedid' legake'.

22 Na' ka wde wna Jesúza' ka', to beṅ'ka' chap yoodo'na' wdape' xagueena', chi'ene':

—¿Biṅhe chilliizo' b̄xoz choo b̄xoz xenni dill'?

23 Na' che' Jesúza'ne':

—Shi bi dii mal ba wnia', wnashki beran ba wnia'. Na' shi shlikzan ba wnia', ¿berache chitzo' nad'?

24 Na'ch de nchejzi Jesúza' bde Anáza'ne' lao Caifáza', beena' nak b̄xoz choo b̄xoz xen.

Sto shii bi b̄cheb Pédrona' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

25 Na' shlak ze Pédrona' chshee cho'a yi'na',
ben'ka' lle' na' che'gake'ne':

—¿Aaga lenon' nako' beeni txen?

Na' bi bchebe', san chi'e:

—Bi nakee txen.

26 Na' to xmos bꞑoz choo bꞑoz xenna', beena'
nak bish' ljwell beena' bꞑhog Pédrona' nague'na',
chi'ene':

—¿Aaga lenon' ble'lenid' Jesúza' gana' lle' yag
olívoka'?

27 Na' stokzə bi bcheb Pédrona', na' lii wchellte
shikwteza'.

Bdegake' Jesúza' lao Pilátona'

(Mt. 27:1-2, 11-14; Mr. 15:1-5; Lc. 23:1-5)

28 Na' cheeni'lesdo' bichejgake' lill Caifáza'
na' biche'gake' Jesúza' gana' chon Pilátona' yel'
joschisa'. Na' ben' Israelka' aga wyoolengake'
Jesúza' gana' chon Pilátona' yel' joschisa', la' aga
wak gaogake' daa chsini'agake' che Paskwa' shi
ba wyoogake' loo yoona'.

29 Na'ch bchej Pilátona' chi'e legake':

—¿Bi xyan chaole che beeni?

30 Na' che'gake'ne':

—Shel' bibi dii mal chone' aga widwa'nto'ne'
lawo' ni, shel'ka'.

31 Na'ch che' Pilátona' legake':

—Li yichi'e na' li gon yel' joschis che' kon ka na
ley chelena'.

Na' ben'ka' chꞑabia' ben' Israelka' che'gake'ne':

—Aga bi lsens chento' de witnto' ben'.

32 Na' daa gok ka', billinin ka wna Jesúza' gak
kat'ka' guete'.

³³ Na'ch biyoo Pilátona' gana' chone' yel' joschisa', na' goxe' Jesúza' chi'ene':

—¿Alin' nako' beṅ' wṅabia' che beṅ' Israelki?

³⁴ Na' che' Jesúza'ne':

—¿Aadii chza'z lalloon no' ka'? ¿Awa beṅ' yoblan ba be'lene' li' xtilaana'?

³⁵ Na'ch che' Pilátona'ne':

—¿Achakilo' beṅ' Israel nad'? Beṅ' wlall cho'kikzan na' bṅozka' chṅabia' le', ba bengake' li' lo na'. ¿Beran beno'?

³⁶ Na'ch che' Jesúza'ne':

—Aga nak yel' wṅabia' cha'na' ka che beṅ' yell-lioki. Shel' nakan ka', beṅ'ka' nak nad' txen wllongake' nad' kwenche bi gox' beṅ' wlall cha'ki nad', shel'ka'. Per aga nak yel' wṅabia' cha'na' de yell-lioz.

³⁷ Na'ch che' Pilátona'ne':

—¿Ana' beṅ' wṅabia'kzan nako', shka'?

Na' che' Jesúza'ne':

—Awe, kan' nakan. Ni cheyi daan golj' na' bid' yell-lioni, kwenche wi'a dill' daa nak dii li. Na' yog'lol beṅ'ka' chzenaggake' dill' lina', chzenaggake' cha'.

³⁸ Na'ch che' Pilátona'ne':

—¿Beran nak dill' li?

Bchoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátona'ne' ka', na'ch bizcheje' kwenche jashaljlene' beṅ' wṅabia' che beṅ' Israelka', na' chi'e legake':

—Ni to dii mal bi chillelid' chon beeni.

³⁹ Na' kon ka yoolole chak yog' yiz chsan' to beṅ' de lillyana' kat' chal' lṅi Paskwi, ¿abi cheenile yisan' beṅ' wṅabia' cheleni, le' nakle beṅ' Israel?

40 Na'ch yog'gake' besyaagake' zillj, che'gake'ne':
 —¡Aga beenan' yisano'! ¡Barrabázan' bisan!
 Na' Barrabáza' nake' to beñ' wban.

19

¹ Na' ka' gok ben Pilátona' mandad bet wdingake' Jesúza'.

² Na' soldadka' bengake' to bxoon de xis yesh' na' bllingake'n yichje'na' ka corona na' bwakw-gake'ne' to lech' de morad.

³ Na'ch wbig'gake' lawe'na' chtitjgakile'ne', chongake' ka beñ' chgoo le' balaan, che'gake':

—¡Toshiizi sechgayi che beeni chñabia' beñ' Israelka'!

Na' wdapgake' xagueena'.

⁴ Na'ch bizchej Pilátona', chi'e beñ' Israelka':

—Li wwia, ni kwejee kwenche inezile ni to dii mal bi chillelid' bene'.

⁵ Na' bchej Jesúza' mbinte bxoon de xis yeshaa yichje'na' na' nakwtie' lech' morada'. Na'ch che' Pilátona' legake':

—Ni ze beeni chaole xya cheyin.

⁶ Na' bxozka' chñabia' na' beñ'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¡Bdee lee yag cruza'! ¡Bdee lee yag cruza'!

Na' che' Pilátona' legake':

—Li yichi'e, shka'. Na' li wdee, le'. La' nad', ni to dii mal bi chillelid' bene'.

⁷ Na' beñ' wñabia' che beñ' Israelka' che'gake'ne':

—De to ley chento' daa na chiyal' guete' daa nalze' nake' Xiin Chios.

⁸ Na' ka gollgake' Pilátona' ka', zizikchli bllebe'.

⁹ Na'ch biyo'e sto shii gana' chone' yel' joschisa' na' chi'e Jesúza':

—¿Gara beṇ' li'?

Na' Jesúza' bikzə bi dill' billi'e.

¹⁰ Na'ch che' Pilátona'ne':

—¿Berache ki chilli'o xtilii? ¿Abi nezilo' nap' yel' wṇabia' kwenche wdaa li' lee yag cruza' na' naptia' yel' wṇabia' kwenche yisan' li'?

¹¹ Na'ch che' Jesúza'ne':

—Aga bi yel' wṇabia' napo' bi gonilo' nad' shel' bi non Chioza'n li'. Daan, beena' bdie' nad' lawo' ni, dol' xench nape' aga ka li'.

¹² Na'ch ka beni Pilátona' wne' ka', biyiljallee naklə ka gone' kwenche yisane' Jesúza', per beṇ'ka' chṇabia' beṇ' Israelka' axt chosyaayigake', che'gake'ne':

—Shi yisano'ne' bi nako' txen Césara', la' nottez beena' ina nake' beṇ' wṇabia', Césarán' chizoshi'e.

¹³ Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yel' joschisa', gana' le Gábata de dill' hebreo, na' zejín latj ga ntaogake' yaj.

¹⁴ Na' gok dga llana' chsini'agake' che lni Paskwa'. Na' ka do gobill goll Pilátona' beṇ' Israelka':

—Ni ze beṇ' wṇabia' cheleni.

¹⁵ Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag cruza'!

Na'ch che' Pilátona' legake':

—¿Acheenile wi'a lsens wda'gake' beṇ' wṇabia' cheleni lee yag cruza'?

Na' bxoza' chṇabia' che'gake'ne':

—Toz Césaran' chñabi'e neto'. Koch no beñ' yoblə zoa.

¹⁶ Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch bche'gake'ne'.

Bda'gake' Jesúza' lee yag cruza'

(Mt 27:32-44; Mr. 15:21-32; Lc 23:26-43)

¹⁷ Na'ch bwa'gake' Jesúza' yag cruz che'na', na' bche'gake'ne' gana' le Gólgota de dill' hebreo, na' zejín Latj che lilit yichj beñ' wet.

¹⁸ Na' na' bda'gake' Jesúza' lee yag cruza', na' lekzka' bda'gake' zi twej beñ' shlaa wej.

¹⁹ Na' Pilátona' bzeje' to dii bda'gake' yichj yag cruz che Jesúza', na' nan ki: “Jesús, beñ' Nazaret, beñ' wñabia' che beñ' Israelka'.”

²⁰ Na' bzeje'n dill' hebreo, dill' latín na' dill' griego. Na' zan beñ' Israelka' blabgake' daa da' yichj yag cruza', la' gana' bda'gake' Jesúza' lee yag cruza' chgaanān gaozə yell Jerusalénna'.

²¹ Daan bxožka' chñabia' beñ' Israelka' gollgake' Pilátona':

—Bi chiyal' inan “Beñ' wñabia' che beñ' Israelka'”; san inan “Beenin nalze' nake' beñ' wñabia' che beñ' Israelka'.”

²² Na' Pilátona' chi'e legake':

—Kon ka ba bzeja'n, ka'kzan igaanan.

²³ Na' biyoll bda' soldadka' Jesúza' lee yag cruza', na'ch beḡ'gake' xe'na' na' bengake'n taplə kwenche bikaa twej chegake'. Na' lekzka' beḡ'gake' xe' dii toña' daa nak to shwilizə.

²⁴ Na' che' ljwellgake':

—Bi wxoxjchon, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: “Bilaagake' xa'na', na' bengake' to wyitj kwenche got'bia' nogake' wkaan.”

²⁵ Na' kwit yag cruz che Jesúza' ze xneena' len ben' bile'na', na' len María, xool Cleófaza', na' María ben' yell Magdálana'.

²⁶ Na' ka ble'i Jesúza' xneena', na' lekzka' ble'ile' gaozə ze to beena' nake'ne' txen, beena' le chakile', na'ch chi'e xneena':

—Beenin yiyoni xiino' naa.

²⁷ Na'ch chi'e beena' nake'ne' txen:

—Beenin yiyoni xnoo naa.

Na' lo llana' bichi'e xna' Jesúza' wzoe' lille'na'.

Wit Jesúza'

(Mt. 27:45-56; Mr. 15:33-41; Lc. 23:44-49)

²⁸ Na' ka wde, nezi Jesúza' ba gok yog' daa llia bia' gakə, na' kwenche yillinin ka na Cho'a Xtill' Chioza', wne':

—Chbilid'.

²⁹ Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis* kwenche bzoagake'n cho'ena'.

³⁰ Na' wde weej Jesúza' daa nak zichj zla', na'ch wne':

—Ba gok yog' daa llia bia' gak naa.

Na' bchek' yichje'na', na' wite'.

To soldad wllibe' to ya dii nla' lawinna' kwit lee Jesúza'

* **19:29** To lo xis: literalmente en una rama de hisopo.

31 Na' ben'ka' chnabia' ben' Israelka' bi goon-gakile' yigaan kwerp che ben'ka' lee yag cruzka' llana' chombaangake'. Daan gollgake' Pilátona' gone' mandad lljtishjgake' ni'a ben'ka' da' lee yag cruza' kwenche yob guetgake' na' yiletjgake' kwerp che'ka' lee yag cruzka'.

32 Na'ch bselee soldad che'ka', na' jtishjgake' chop laate ni'a ben' necha' da' kwit Jesúza', na' lekzka' bengake' che beena' sto da' zi shlaa kwite'na'.

33 Na' ka jabig'gake' gana' da' Jesúza' ble'gakile' ba wite', na' bi wdishjgake' ni'ena'.

34 Na' to soldada' wllibe' to ya lo tosh' kwit li'ena' na' lii bchejten chen len nis.

35 Na' beena' choe' dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e.

36 Gok diiki kwenche billinin ka na Cho'a Xtill' Chioza' gana' na: “Ni to llitka' yo'e bi chishjgake'.”

37 Na' gan yoblə lee Cho'a Xtill' Chioza' chiznan: “Wwiagake' beena' wllibgake' yana'.”

Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

38 Na' ka wde gok diiki, José ben' yell Arimatéana', wnable' Pilátona' wi'e latj yikee kwerp che Jesúza'. Joséna' goke' txen Jesúza' do ngash'zə daa bllibe' ben'ka' chnabia' ben' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'.

39 Na' wyajlene' Nicodémona', beena' wyaj jawia Jesúza' wal-lə. Na' no'e ka do shichoa kil dii chla' zix daa nongake' de mirra na' nchixan daa le áloe.

40 Na'ch btobgake' kwerp che Jesúza' to lech' ton na' blla'gake'n daa chla' zix, kon ka chon ben' Israelka' kat' chkwash'gake' to ben' wet.

41 Na' gaozə gana' bda'gake' Jesúza' lee yag cruza' de to latj ga nazgake' yag dii chbia dii zix, na' na' zoa to blej kob dii bin' koogake' ni tlish' ben' wet.

42 Na' daa chakbyengakile' wsini'agake' che llana' chombaangake', lii wlootegake' kwerp che Jesúza' loo bleja' zoa gaozə na'.

20

Biban Jesúza' ladj ben' wetka'

(Mt. 28:1-10; Mr. 16:1-8; Lc. 24:1-12)

1 Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'.

2 Na'ch bizee ziyajdoe' gana' zoa Simón Pédróna' na' sto beena' nak Jesúza' txen, beena' le gokile', jayelle' legake':

—Ba jalejgake' Xanchona' loo bana' na' bi nezinto' galə jaloogake'ne'.

3 Na'ch wza' Pédróna' len beena' sto zejgake' cho'a bana'.

4 Choptie' zejdogake', per beena' to bxonjche' aga ka Pédróna' na' zigaate le' blline' cho'a bana'.

5 Na' bchekee bwie' loo bana' na' ble'ile' lech'ka' chi' na', per bi wyo'e.

6 Na' ka bllin Simón Pédróna' na' wyo'e loo bana' na' lezkka' ble'ile' lech'ka' chi' na'.

7 Na' lecha' bdob yichje'na' aga lenan chi' kwit lech'ka', san ndoban chi'n ka'la.

⁸ Na'ch lekzka' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúzan'.

⁹ La' kana' aga ba wyajni'yen'gakile' Cho'a Xtill' Chioza' gana' cho'en dill' yiban Jesúza' ladj ben' wetka'.

¹⁰ Na'ch ben'ka' chop non Jesúza' txen biyajgake' gana' zoagake'.

Jali'lao Jesúza' María, ben'yell Magdálana'
(Mr. 16:9-11)

¹¹ Na' Maríana' bigaane' cho'a bana' chbelle'. Na' lo zej chbelle' bcheke wenché bwie' loo bana'.

¹² Na' ble'ile' chop anjl zoagake' do xtil, chi'gake' loo bana', toe' chi' yichjinna' na' stoe' chi' xni'alin gana' got' kwerp che Jesúza'.

¹³ Na'ch che'gake' Maríana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na', na' bi nezid' galə jaloogake'ne'.

¹⁴ Shintg wne' ka', ka bllii jalawe'na' na' ble'ile' ze Jesúza' kolleena', per bi biyombi'e shi Jesúzan'.

¹⁵ Na'ch che' Jesúza'ne':

—¿Berache chbellzo', noolə? ¿Nodaa chiyiljo'?

Na' Maríana' chakile' beena' chap yag zixkan', na' chi'ene':

—Ben'do', shi ba bibejo'ne', wnagach nad' galə jadixjo'ne' wenché yichi'ane'.

¹⁶ Na'ch che' Jesúza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejin: ben' chli' chsedi ben'.

¹⁷ Na' che' Jesúza'ne':

—Bi goxoo nad', la' bin' yiyep' kwit Xa'na'. Lete biyaj, jane ben'ka' nak nad' txen jayellgake' ba ziyaa kwit Xa'na', beena' lekzka' nak Xale. Ll-jazoalen' Chios cha'na', beena' lekzka' nak Chios chele.

¹⁸ Na'ch biza' María, ben' yell Magdálana', jayelle' ben'ka' nak Jesúza' txen nan ba ble'ile' Xancho Jesúza'. Na' golle' legake' diika' goll Jesúza' le'.

*Jali'lao Jesúza' ben'ka' nakgake'ne' txen
(Mt 28:16-20; Mr. 16:14-18; Lc 24:36-49)*

¹⁹ Na' ka goł lo llana' bibane', lla nech che xmanña', ba ndop nllag ben'ka' nak Jesúza' txen na' nsejtegake' yooná' daa chllebgake' ben'ka' chñabia' ben' Israelka', ka gokbe'gakile' ba ze Jesúza' ladje'ka', na' chi'e legake':

—Soashgale mbalaz.

²⁰ Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' ben'ka' nakgake'ne' txen le bibagakile' ble'gakile'ne'.

²¹ Na'ch wize' Jesúza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' llje'le cho'a xtilaana' yell-lioni.

²² Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántona'.

²³ Na' ben'ka' yizi'xenle saaxya che'ka', wiyakx-enan. Na' ben'ka' bi yizi'xenle cheyin, bi yiyakxen chegake'.

Tomáza' bi wyajli'e shi biban Jesúza' ladj ben' wetka'

24 Tomáza', beena' che'gake' Dídimo nake' txen ben'ka' shllin, na' bi lene' ka jali'lao Jesúza' legake'.

25 Na' che'gake'ne':

—Ba ble'into' Xanchona'.

Na' Tomáza' chi'e legake':

—Shi bi ile'id' neena' na' wde xben'ni gana' wde klabka', na' wde na'ni kwit li'ena', aga wyajli'a.

26 Na' ka wde xon' lla, dii yoblə bidop ben'ka' nongake' Jesúza' txen loo yoona' na' len Tomáza'. Na' la'kzi nsejtegake' yoona', wyoo Jesúza' jsie' ladje'ka'. Na' chi'e legake':

—Soashgale mbalaz.

27 Na'ch chi'e Tomáza':

—Bwia na'ni, na' bne'n xbeno'na'; na' bne' noona' kwit li'ani. Bi gakchoplaloo, san wyajle'.

28 Na'ch che' Tomáza'ne':

—iLin' nako' Xan' na' naktio' Chios cha'!

29 Na' che' Jesúza'ne':

—Galj ble'ilo' nad' na'ch chajli'o. Chakomba ben'ka' chajle'gake' la'kzi bin' ile'gakile' nad'.

Bzej Juanna' libri kwenche shajle' ben' Jesúza' nake' Xiin Chios

30 Zan yel' wak daa ben Jesúza' lao ben'ka' nakgake'ne' txen bi nyojgakan lee libri.

31 Per diiki nyojgakan kwenche shajle'le Jesúza' nake' Xiin Chioza' na' len' Crístona', beena' wleje' inabi'e, na' daa gonlilall'lene' gat' yel' mban chele dii bi te cheyin.

21

Jali'lao Jesúza' ben'ka' nakgake'ne' txen

1 Ka wde, Jesúza' jali'lawe' sto shii beṅ'ka' nakgake'ne' txen cho'a Nisdo' che Galileana' daa lekzka' le Nisdo' che Tiberias. Na' ki gok:

2 Simón Pédrona' len Tomáza', beena' nsi'gake' Dídimo, na' Natanaela', beṅ' yell Canána' daa lliá gana' mbani Galileana', na' chopte xiṅ Zebedewa' na' zi chop beṅ'ka' nongake' Jesúza' txen lle'gake' Galileana'.

3 Na' Simón Pédrona' chi'e legake':

—Sha'ch' lljxen' beḷa'.

Na' legake' gollgake'ne':

—Lekzka' wza'lennto' li'.

Na'ch wyoogake' to loo barkw zejgake' wxen beḷa', na' ni tlish' kono wxengake' do yel.

4 Na' cheeni'lesdo' bllin Jesúza' cho'a nisdo'na', na' beṅ'ka' nakgake'ne' txen aga chakbe'gakile' shi len'.

5 Na'ch Jesúza' wñie' legake', chi'e:

—Le' beṅ' bish'dawaa, ¿abin' senle beḷa' gaocho?

Na' che'gake'ne':

—Aga no de.

6 Na'ch che' Jesúza' legake':

—Li wzaḷ' yixj chelena' shḷaa de shḷi che barkwa' na' idol'gakkb.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan beḷka'.

7 Na' beena' le chaki Jesúza'ne', golle' Pédrona':

—¡Xanchonan'!

Na' kon ka beni Pédrona' golle'ne' ka', lli biyakwte xe'na', na' bxitee loo nisa'.

8 Na' ben'ka' sto biyajlengake' barkwa' cho'a nido'nalə, zingoyon yixja' daa zinyichachga belka', la' aga nakchan zit', ka sto guioya metrzan.

9 Na' ka bichejgake' loo barkwa', ble'gakile' ba chi' yi'na' xna na' xoa to bel lawinna', na' dete yetxtil.

10 Na' che' Jesúza' legake':

—Li yiyox'to belka' zi' wxenle.

11 Na'ch wyoo Simón Pédrone' loo barkwa' kwenche jaselle' yixj belə' na' bigoyoe'n ax̄t cho'a nido'na'. Na' la'kzi tolla'cha nak yixja' daa ziyoon to guioya shiinyon bel yelka', bi bcheza'n.

12 Na'ch che' Jesúza' legake':

—Li da gaole xsila'.

Na' ni to ben'ka' nakgake'ne' txen bi biyaxj-gakile' ye'gake'ne': “¿Nora li'?” La' gokbe'gakile' Xancho Jesúza'kzan'.

13 Na'ch wbig' Jesúza' na' bexee yetxtila' len belə' na' bi'e che chegake'.

14 Na' dga gok de wyon shii jali'lao Jesúza' ben'ka' nakgake'ne' txen ka wde bibane' ladj ben' wetka'.

Bshaljlen Jesúza' Simón Pédrone'

15 Na' ka bidaogake' xsila', na'ch che' Jesúza' Simón Pédrone':

—Simón, xiin Jonás, ¿achakchilo' nad' aga ka to chaki ben'ki nad'?

Na' Pédrone' chi'ene':

—Xan', nezczilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad', ben'ka' nak ka xil'do' cha'.

16 Na' de wchop shii wiznabile'ne', chi'ene':

—Simón, xiin Jonás, ¿achakilo' nad'?

Na' Pédróna' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia ben'ka' chonlilall'gake' nad',
ben'ka' nak ka xil' cha'.

¹⁷ Na' de wyon shii wiznabile'ne', chi'ene':

—Simón, xiin Jonás, ¿ana' chakilo' nad'?

Na' gokyeshii Pédróna' daa ba gok shon shii
chñab Jesúza' shi chakile'ne', na' chi'ene':

—Xan', nez nle'ilo' yog'lolte, na' nezkzilo' chakid'
li'.

Na'ch che' Jesúza'ne':

—Na'len wdap bwia ben'ka' chonlilall'gake' nad',
ben'ka' nak ka xil'do' cha'.

¹⁸ Dii li nia' li', ka goko' ben'wew', gokw xalaano'
to kwinzó' na' wyajo' kon ga wnan cho'. Per
kat' ba goxoo, wli nooka' na' yiwakw ben'yoblə
xalaano'na', na' wchi'e li' ga bi cheenilo' shajo'.

¹⁹ Na' daa goll Jesúza'ne' ka', bzajniile' legake'
ka guet Pédróna', na' daa guete' ka' sho' Chioza'
balaan. Na' ka wde golle' Pédróna' ka', chi'ene':

—Btiplaloo benlilall' nad' toshiizi.

Beena' le chaki Jesúza'ne'

²⁰ Na' biyechj Pédróna' na' ble'ile' beena' sto,
beena' le chaki Jesúza'ne', noe' legake'. Len' wchi'e
kwit Jesúza' kana' zeelo wdaogake' xshe'na' kana'
wnabile'ne', chi'ene': “Xan', ¿norakznton' gon li' lo
na' ben' malka'?”

²¹ Na' ka ble'i Pédróna'ne', na'ch chi'e Jesúza':

—Xan', ¿shera beeni?

²² Na' che' Jesúza'ne':

—Shi cheenid', ni mbankz beeni kat' yiyed'. Bi sio' beena' wneyi. Lin' btiplaloo benlilall' nad' toshiizi.

²³ Na' daa golle' ka', wze dill' ladj ben'ka' chonlilall' Jesúza' nan aga wet beena'. Per bi goll Jesúza' Pédróna' bi guet beena', san chi'ene': “Shi cheenid', ni mbankze' kat' yiyed'. Bi sio' beena' wneyi.”

²⁴ Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' nezinto' dillaa cho'e nakan dii li.

²⁵ Dii zanch dii ben Jesúza' na' bi nyojan. Shel' nyoj yog' diika' bene', chakid' bi gaki yell-lioni ikwa' librka' shel'ka'.

**Dill' wen dill' Kob Che Jesucrístona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

f98bf0c8-4467-559d-82ab-96644a44d38f